

رواية

العسل في السم

د/أحمد غزالي

اسم الكتاب: العسل فى السم

اسم الكاتب: د/ أحمد غزالي

تصميم الغلاف: عبدالله عباس

رقم الإيداع: ٢٠٢٤-٣٦٧١

الترقيم الدولى: ٧-٨-٧-٨٧٣٤٤-٩٧٧-٩٧٨

كافة الحقوق محفوظة للناشر والمؤلف

لا يُسمح بإعادة طبع أو توزيع أي جزء بأي طريقة، بما يشمل ذلك التصوير أو الطباعة أو التسجيل الصوتي أو أي وسيلة أخرى إلكترونية أو غير إلكترونية، دون إذن كتابي مسبق من الناشر، ويسمح فقط في حال الاستعانة ببعض الفقرات لغرض النقد والدراسة، طبقاً لما تحدده قوانين واتفاقيات حقوق الملكية الفكرية.

Novel

Honey In poison

Dr/ Ahmed Ghazaly

لا تظننى ..

لا أعلم من أين تؤكل الكتف.

ولكن ..

سحقا لتلك الكتف..

التي تؤكل بذلك الرخص.

د/أحمد فتحي غزالي

(١)

كان (أبو عاطف) البواب - رجل أسمر الوجه في منتصف الخمسينات من عمره- جالساً في مدخل عمارة بأحد الأحياء السكنية المتوسطة بالقاهرة، وهي نفس العمارة التي يسكن بها (سيف)، كان (أبو عاطف) قد جاء من إحدى قرى صعيد مصر مع زوجته بعد أن ضاق به الحال مع بداية الألفية الثالثة، وبينما كان جالساً، وجد ابنه (عاطف) - شاب أسمر في منتصف الثلاثينات من عمره - واقفاً على ناصية الشارع ومعه اثنين من أصدقاءه، وكان معهم رجل آخر يبدو من ملابسه أنه ميسور الحال، وكان (عاطف) يمسك بيده مجموعة من النقود، ثم ارتبك فوضع النقود في جيبه سريعاً، بعد أن لمح أبيه الذي كان ينظر له بحدة، ثم ودع أصدقاءه، وتوجه ناحية أبيه، ثم قال له:

- إزيك يا بابا؟

- أهلا، كنت بتعمل إيه يا ض؟

- مفيش يا بابا، مصلحة كده السريع.

- مصلحة؟ تاني؟ يا ض أنا مش قولتلك ميت مرة قبل كده بلاش الشغل دة.

رد عليه (عاطف) بضيق:

- وفيها إيه يا بابا؟ اللي يسمعك كده يقول اني بتاجر في المخدرات.

- يابني شغلانة السمسرة دي كلها وجع قلب، فلوسها حلوة آه، إنما مبيجيش من وراها غير المصايب.

- يابا م كل البوابين عايشين من السمسرة، أديك شايف أهو اللي بقى عنده شقق بيأجرها لحسابه،

واللي بنى عمارة وعماريتين كمان، يعني عاجبك حالنا كده يا بابا؟

- مالو حالنا بس يا ابني، احمد ربنا.

- يابا مقولناش حاجة الحمد لله، بس مفيهاش حاجة يعني أما الواحد يشغل دماغه، طالما مبنعملش

حاجة غلط.

- اوعاك تكون فاكرنى كبرت وعجزت، وبقيت بخرف ومش فاهم حاجة، يا ابني أنا أقدم بواب فى الشارع هنا، ولو كنت عايز أمسك قرش كنت مسكت من زمان، بس أنا عارف ان الشقق المفروشة دي كلها شغل بطل، اللي عايز يأجرله ليلة يسهر سهرة لا مؤاخذة، واللي هربانة من أهلها مع عيل صايع، ويا ابني ياما مصايب حصلت فى الشقق دي، وساعتها أول واحد الحكومة بتشده هو السمسار، وأنا خايف عليك، ده غير ان فلوسها حرام.

- حرام؟. حرام ايه يابا؟. واللي احنا فيه ده مش حرام؟

- بقولك ايه يا ض انت، اوعاك أشوفك تاني مرة شغال الشغل ده، ساعتها هرميك فى الشارع، وهتبقى ولا ابني ولا أعرفك فاهم؟ وامشي يلا غور من وشي الساعة دي.

دخل عاطف إلى البدروم الذي يعيشون فيه، فوجد أمه تجلس على طاولة تعد طعاماً - كانت إحدى سكان العمارة قد طلبته منها - ووجد أخته (شوقية) جالسة على السرير، وأمامها مجموعة من الكتب الدراسية - فتاة خميرية ذات ملامح هادئة لم تبلغ العشرين من عمرها - وقد تعجبت (شوقية) من ملامح الضيق التي ارتسمت على وجه (عاطف)، فسألته:

- مالك يا عاطف؟

- أبوكي يا أختي، مش عاجبه حالي، وعايزني أقضي بقية عمري أمسح سلالم العمارة زيه.

- اهدى بس وصل ع النبي، وبعدين ميصحش تتكلم عن أبوك كده، أبوك خلاص كبير، وياما تعب وشقي عشان يكبرنا ويعلمنا، وبعدين م هو مقصرش معاك فى حاجة، انت اللي سبت الدبلوم ومرضتتش تكمل علام.

- دبلوم ايه؟ يا أختي انتيلي، م انتي طالعة فقريه زيه، سبنالك يا أختي العلام، بكرة تخلصي كلية الآداب اللي انتي فرحانة بيها دي ومتلاقيش شغل، وأخرتها هتيجي تقوري محشي جنب أمك لسكان العمارة.

- يا ابني انت جرائك ايه بس؟ وبعدين م تقعد معانا شوية، انت رايح فين؟

- هنزل، وانتى مفكرانى هفضل قاعدلكم فيها.

ثم غير (عاطف) ملابسه وخرج إلى الشارع مرةً أخرى، متوجهاً نحو منطقة الدقي حيث كان قد أخبره أحد أصدقائه بأن أحد المكاتب كان يريد ساعي للعمل بالفترة المسائية براتب جيد.

(٢)

كان (سيف) شاب في منتصف العشرينات من عمره، ليس له إخوة، عاش وحيداً مع أمه بعد أن مات أبيه وهو طفل، وسيم وأنيق ومتقف، يعشق القراءة والتاريخ والفن والمسرح، كان يرسب كل عام في سنة التخرج - على الرغم من أنه كان الأول على دفعته طوال السنوات الثلاثة الأولى بقسم التاريخ بكلية الآداب - إلا إنه كان لا يريد أن يترك مسرح الكلية، فهو يرى نفسه ممثل ومخرج مسرحي جيد وبالفعل كان كذلك، عشقه للفن جعله لا يريد أن يترك مسرح كلية الآداب، الذي كان رئيساً لفرقته، ولا يرى نفسه في أي وظيفة أخرى، ولكنه أحياناً كان يعطي بعض الدروس الخصوصية البسيطة في مادة التاريخ بالمنزل، ليكسب قدراً بسيطاً من المال يعيش منه بجانب تحصيله لإيجار شقة متواضعة كان قد ورثها عن أبيه.

وذات يوم، بينما كان (سيف) مجتمعاً مع فريق التمثيل بمسرح الكلية، ويقوم بعمل بروفه لإحدى العروض المسرحية - باللغة العربية الفصحى - شعر بضيق شديد وهو يقول:

- زفت، كله زفت، محدش حافظ دوره، وحتى اللي حافظ مش عارف ينطق التشكيل صح، إيه الإستهتار اللي انتو فيه ده؟ مفيش أي تحمل للمسؤولية خالص.

ردت (ماهيتاب):

- م هو يا (بروف) محدش بيتكلم لغة عربية فصحى دلوقتي، متخلي العرض باللغة العامية وخلص، وهتشوف ساعتها كلنا هنعمل إيه.

كانت (ماهيتاب) طالبة بكلية خدمة إجتماعية، محدودة الثقافة، تعيش في إحدى عشوائيات القاهرة، تمتلك جسداً شعبياً منفجر الأنوثة، وكانت أحياناً تخلع الحجاب بمجرد خروجها من الحارة، ذلك بعد أن تضع العديد من مساحيق التجميل، في محاولة منها لإظهار جمال وجهها المتواضع.

إنفعل (سيف) وهو يرد عليها:

- أولاً يا ماهيتاب هانم مسمهاش اللغة العامية، إسمها اللهجة العامية، وأظن أنا شرحتلكم قبل كده

الفرق بين اللهجة واللغة، ثانياً مينفعلش نعمل شكسير بالعامية.

إقتربت منه (نرمين) وهي تهمس في أذنه:

- خلاص يا حبيبي، مضيقش نفسك، كفاية كده النهاردة ونبقى نكمل بكرة.

كان الجميع يعلم أن (نرمين) هي حبيبة (سيف)، وهي طالبة بكلية الآداب قسم اللغة الإنجليزية، فتاة

جميلة، وهادئة، وراقية، حبها ل(سيف) وتأثرها به وبأفكاره، جعلها تعشق التمثيل والمسرح.

اقتنع (سيف) بكلام نرمين، فقال بصوت مرتفع:

- خلاص كفاية كده النهاردة، بس إياك بكرة ملقيش حد فيكم حافظ، وبالتشكيل كمان.

وهنا إقترب (جمال) من (نرمين)، وهو يهمس:

- بقولك إيه يا نرمين، متيجي نتعدى سوا النهاردة، وبعدها أوصلك البيت.

كان (جمال) ابن عم (نرمين) ويعشقها منذ الطفولة، ولكنه كان يعلم علاقتها ب(سيف)، ولذلك فعلى

الرغم من تخرجه من كلية الآداب قسم اللغة العربية، إلا أنه مازال يحضر البروفات في المسرح، حتى

لا يتركهما معاً، بعد تخرجه من الكلية - وبفضل علاقات والده - استطاع أن يعمل صحفي ومراسل بعدد

من الصحف والمواقع الإلكترونية التي تبحث عن الفضائح والتريند، صحيح أنها صحف ومواقع

متواضعة جداً، إلا أنه تمكن من خلالها من تكوين شبكة علاقات إجتماعية لا بأس بها.

ردت عليه (نرمين):

- لا شكراً يا جمال، سيف هيوصلني.

يخرجون جميعاً من المسرح، وبينما كان (سيف) يمسك يد (نرمين)، ظهرت (شوقية) التي كانت واقفة

على باب المسرح، وكانت تنتظر ل(سيف) الذي تعجب من وجودها، فتوجه ناحيتها ثم قال:

- شوقية؟! إزيك؟

ردت شوقية وهي تتعثر بالكلام:

- الحمد لله يا أستاذ سيف، إزي حضرتك؟
- بخير الحمد لله، غريبة يعني، إيه اللي جايبك هنا؟ في حاجة ولا إيه؟
- لا مفيش، أنا طالبة هنا.
- إيه ده، بجد؟ مشوفتكيش هنا قبل كده يعني؟
- م هي دي أول سنة ليا، وبعدين أنا بخلص المحاضرات بتاعتي وبروح على طول.
- ربنا يوفقك، عموماً أنا كل الدكاترة وشئون الطلبة والناس كلها هنا حبايبي، لو إحتجتني أي حاجة قوليلي على طول، هتلاقيني هنا في المسرح طول النهار.
- شكراً، يا أستاذ سيف، بعد إذنك.
- إتفضلني، مع السلامة.
- بعدها إلتفتت (نرمين) نحو (سيف) وهي تقول:
- مين دي؟
- دي (شوقية) بنت محترمة ومجتهدة جداً.
- أيوة تعرفها منين يعني؟
- فقال لها (سيف) هامسا حتى لا يسمعه أحد:
- دي بنت البواب بتاعنا
- رفعت (نرمين) حاجبها وهي تقول بغيرة:
- أممممم، بس حلوة شوقية.
- ههههه،.. بقولك بنت البواب بتاعنا.

(٣)

كان (أيمن) الصديق المقرب ل(سيف) منذ الطفولة، وكأنا يتشاركنا الأحلام معاً، فقد كان (أيمن) طالباً بكلية الآداب قسم اللغة العربية، وكان ممثلاً وشاعراً، أحب الشعر مثل أبيه - الذي كان أستاذاً للغة العربية بإحدى المدارس الخاصة - وأيضاً كان يجيد الكتابة، لذلك إعتد عليه (سيف) في إعادة صياغة النصوص المسرحية، وكان يعتبره المساعد الأول له بالمسرح، إلا أنه تخرج قبل عدة سنوات، ولكنه مازال يتردد على (سيف) بمسرح الكلية، وبينما كان (أيمن) يزور (سيف) في بيته كعادته دائماً منذ الصغر، قال:

- بقولك إيه يا سيف، انت لازم تخلص الكلية السنة دي بقى، مش معقول كده.
- هو إيه اللي مش معقول؟ م انت مخلص أهو بقالك ٣ سنين، عملت إيه يعني؟ م انت لسة قاعد في بيتكو وبتاخذ مصروفك من أبوك.
- متزعش أوي كده ياسيدي، مش قصدي، أنا بس خايف عليك.
- ولا تقصد يا عم أيمن، انت اللي حقك عليا، وفعلاً كلامك صح.
- صمت (سيف) قليلاً، وأشعل سيجارة، ثم أكمل بضيق:
- أنا مخنوق اوي يا أيمن، مش عارف هنفضل كده لحد إمتى، السنين بتجري بينا والفرصة إتأخرت أوي يا صاحبي.
- أنا أكثر واحد حاسس بيك يا سيف، معلى كله خير ان شاء الله، وبعدين ايه يا عم انت هتقلبها نكد كده ليه؟ أومال فين كلامك يا (بروف)؟ دة انت اللي طول الوقت بتظننا وبتحمسنا إننا نكمل، يا ابني ده أنا من غيرك كنت انتحرت من زمان، هههههه، فكها كده يا عم سيف وسيبها على الله.
- ونعم بالله.
- طيب، أنا هروح بقى، وأبقى أشوفك بكرة في البروفة.

وعندما نزل (أيمن) وجد (عاطف) على باب العمارة، فسلم عليه كعادته، وقال:

- إزيك يا عاطف.

- الحمد لله، أهلا يا أستاذ أيمن.

- مش باين يعني؟ كل م اجي ل(سيف) مش بشوفك.

- والله يابيه أصل أنا ربنا كرمني ولقيت شغلانة حلوة كده.

- كويس، ربنا يكرمك، وشغال فين؟

- في شركة عاصي بروتيكشن.

- عاصي إيه؟

- عاصي بروتيكشن للانتاج الفني.

- آاه بروتيكشن، بس إيه عاصي بروتيكشن دي؟ أنا عمري م سمعت عنها.

- إزاي يابيه؟ دي شركة انتاج كبيرة أوي في الدقي، وصاحبها الأستاذ عاصي راجل محترم جدا.

أخرج (أيمن) ورقة بعشرة جنيهات من جيبه وأعطاه ل(عاطف)، وهو يقول:

- يا راجل، طيب إذا كان كده بقى، م تاخذلنا معاد مع الأستاذ عاصي ده، طالما بتقول إنه راجل

محترم.

أخذ (عاطف) العشرة جنيهات ووضعها في جيبه، وهو يقول:

- ولزومه إيه التعب ده بس يابيه، إحنا عنينا من غير حاجة، ده انت تنور الشركة كلها.

- حبيبي يا عاطف، خد رقمي بقى وأول م تظبط المعاد تكلمني على طول.

- من عنيا يابيه، أنا كده كده كنت طالع ع الشركة دلوقتي أهو، إتفضل قول الرقم.

(٤)

فى صباح اليوم التالى، وبينما كان فريق المسرح مجتمعاً بالكلية لأداء البروفة، تلقى (أيمن) مكالمة من (عاطف) بعد أن حدد له موعد مع (عاصي)، فأخبر (سيف) بما حدث، فشعر بالضيق، وانفجر قائلاً:
- عاطف مين اللي حدد لنا معاد؟ انت إجننت يا أيمن؟ يعنى يوم م ربنا يكرمنا ونقع على شركة إنتاج يبقى عاطف هو الواسطة بتاعتنا.

- وماله عاطف بس يا بروف؟ وبعدين مفيش واسطة ولا حاجة، هو الواد بس حددلنا المعاد مع الرجل، وإحنا هنروحله ونوريه كل المواهب بتاعتنا، يمكن تظبط معانا المرة دي.
- يا سلام؟ وبعدين مين عاصي برودكشن ده أصلاً؟ أنا عمري م سمعت عنه قبل كده.
- ياسيدي اعتبرها شركة إنتاج جديدة، وإحنا كده كده مش خسرانين حاجة، متعقدهاش بقى والنبي يا بروف.

- ماشي يا أخويا، وقالك إمتى بقى؟

- النهاردة بالليل الساعة ٧.

بلغ (سيف) أعضاء الفريق بالموعد وتم الإتفاق على أن يذهبوا معاً فى المساء.

(٥)

أمام أحد المطاعم، توقفت سيارة كانت تجلس (شوقية) بداخلها بجانب رجل أصلع بدين في أواخر الأربعينات من عمره، وكانت (شوقية) تغلق زرار البلوزة وتنظر في المرأة وهي ترتدي طرحتها على شعرها، بينما كان الرجل ينظر لها بنظرة ملئتها شهوته الغريزية، وقد فرغ فاه وكاد أن يسيل لعابه وهو يقول:

- هتخلصي الشيفت بتاعك إمتى يا شوشو؟

- ع الساعة ٧ كده.

- حلو، ههدي عليكى آخدك، وتيجي تباتي معايا النهاردة.

إنفعلت (شوقية) وهي تقول:

- تاني؟ إحنا مش إتكلمنا في الموضوع ده قبل كده، خلصني يا بيه واديني ال ٢٠٠ جنيه خليني ألحق أشوف أكل عيشي.

- بالراحة علينا ياجميل مش كده، طب فكري، وهديكى ٢٠٠٠ جنيه مش بس ٢٠٠.

- لا يا حبيبي خليهومك، أنا متفقة معاك م الأول أنا أخري العربية وبس.

أخذت (شوقية) ال ٢٠٠ جنيه، ونزلت من السيارة، ثم دخلت المطعم، وفي الداخل بينما كانت تخلع ملابسها لترتدي ملابس الشغل (اليونيفورم) دخلت عليها (ميرفت) زميلتها وهي تقول:

- مالك يا بت يا شوقية لاوية بوزك ليه كده ع الصبح؟

- مفيش، رجالة عينها فارغة ومبتشبعش.

- يا بت م انتي اللي هبله ومنشفة دماغك.

- سبيني والنبي يا مرفت، أنا مش ناقصاكي.

- يا بت أنا عايزة مصلحتك، انتي لسة صغيرة وحلوة والرجالة كلها هتموت عليكى، مشي حالك شوية، عشان متخبيش خبتي.

- أمشي حالي إيه أكثر من كده؟ أنا مقدرش أروح مع راجل البيت، أنا بنت بنوت يامرقت ولا نسييتي؟
- هو ده المطلوب يا عبيطة، ده الراجل من دول مستعد يدفع دم قلبه عشان واحدة زيك.
- انتي اجننتي يا مرفت؟ طب وليلة جوازي هعمل إيه؟ ده أهلي يقطعوني تحت.
- يا بت الصين مخلتش حاجة معملتهاش، والدكاترة الشمال على قفا مين يشيل، مشي انتي حالك بس وجمعيلك قرشين، وبالفلوس يا حبيبتي اللي اتكسر بقي بيتصلح دلوقتي عادي.
- بقولك ايه يا مرفت، متفتحيش معايا الموضوع ده تاني، أنا يا اختي أخري شوية حاجات بسيطة كده في العربية وخلص، أهو قرشين كده على قد مصاريف الجامعة لحد م أتنيّل أتخرج وأشوفلي شغلانة محترمة، وربنا يسامحني بقي، ويتوب عليا من العيشة اللي أنا عايشاها دي.

(٦)

كانت (رانيا) فتاة جميلة في أواخر العشرينات من عمرها تخرجت من كلية الإعلام بجامعة القاهرة، وهي سكرتيرة (عاصي)، وكانت تحبه - على الرغم من أنها كانت ترفض الكثير من تصرفاته ونزواته - لديها نظرة فنية في مجال الانتاج الإعلامي، وقد أضاعت العديد من الفرص الذهبية للعمل في عدد من شركات الانتاج الكبرى في سبيل أن تظل بجانب (عاصي) في شركته المتواضعة.

وكان (عاصي) شاب في منتصف الثلاثينات من عمره، تخرج منذ ٣ سنوات من إحدى كليات الإعلام بإحدى الأكاديميات الخاصة - بعد أن ظل يرسب سنوات طويلة ويتنقل بين الكليات والمعاهد - كان مستهتراً يجري وراء شهواته، وبعد تخرجه فتح مكتب للانتاج الفني، ذلك بعد أن رفض أن يعمل مع والده الذي كان تاجراً كبيراً للفواكه والخضروات، وبعد الكثير من الإلحاح، فتح له والده ذلك المكتب، ولكن (عاصي) لم تحلو له كلمة مكتب، فأطلق عليه اسم (شركة عاصي برودكشن للانتاج الفني).

وفي تمام الساعة السابعة مساءً، بينما كانت (رانيا) جالسة على مكتبها في ريسبشن شركة عاصي، دخل كلا من (سيف وأيمن وعلاء وجمال ونرمين وماهيتاب)، فاستقبلتهم (رانيا) وهي تقول:

- أهلاً، مستر عاصي في انتظاركم، مين يحب يدخل الأول؟

ارتبك الجميع - كعادتهم في تلك المواقف - والتفتوا نحو (سيف)، الذي رد بثقة وقال:

- أنا يا فندم ممكن أدخل الأول.

دخل (سيف) و(رانيا) لمكتب (عاصي)، وحكى (سيف) لهما عن تجاربه في الإخراج والتمثيل والكتابة، وعشقه للمسرح والأدب العالمي، ومحاولاته العديدة في شركات الانتاج ومكاتب الكاستنج ومكاتب المخرجين، وبدا على (عاصي) الشعور بالملل. ثم خرج (سيف) ودخل (أيمن) وألقى بعض أبيات من أشعاره، ثم خرج (أيمن) ودخل (علاء) وغنى بصوته الجميل بعض المقاطع الغنائية، ثم دخل (جمال)، ثم (نرمين)، ثم (ماهيتاب)... وهكذا.

بعد أن أنهو جميعاً المقابلة، جلسوا في الريسبشن، بينما كانت (رانيا) و(عاصي) داخل المكتب، فقالت

(رانيا):

- هاه، إيه رأيك؟

- والله أنا شايف إن سيف ده واد معقد، وعامل فيها مثقف وعنده وجهة نظر بقى وهيقرفنا، وبردو

علاء وأيمن مينفعوش.

نظرت له (رانيا) بإنفعال وهي تقول:

- آه، لكن نرمين وماهيتاب هما اللي ينفعو صح؟

- يا حبيبتي مش قصدي متفهمنيش غلط، طب قوليلي انتي هنعمل إيه بعيل شاعر أهبل، ولا مطرب

فاشل، ولا حتى بالواد المثقف ده؟

ردت (رانيا) وقد ازدادت إنفعالا:

- ده على أساس إن نرمين وماهيتاب دول بيقوا منى زكي ومنة شلبي يعني؟ ولا هو انت جاي في أي

بنات وخلص؟ على فكرة بقى سيف اللي مش عاجبك ده، أنا مقتنعة بيه جداً لأنه شكله فنان بجد،

وكمان علاء صوته حلو أوي.

- يا ستي مش قصدي البنات بس، طب م أنا موافق على جمال، واد صحفي وكلامجي وشاطر،

وهينفعنا بعلاقاته.

- قصدك ولا مش قصدك، عموماً عشان تبقى فاهم، سيف هو الكبير بتاعهم، وكلهم بيسمعو كلامه،

ومش هينفعوا غير مع بعض، فيا تقبلهم كلهم، يا ترفضهم كلهم.

فكر (عاصي) قليلاً، ثم قال بضيق:

- ماشي يا ستي يبقى كلهم مقبولين عشان خاطر عيونك، وعشان متقديش تقوليلي إني بقبل البنات

وبس.

خرج (عاصي ورائيا) من المكتب إلى الريسبشن، ثم قالت (رائيا):

- مبروك يا شباب، مستر عاصي وافق عليكم كلكم، وهيجمع بيكم يوماً الفترة اللي جاية عشان ندرس انتاج فكرة مشروعكم الجديد.

فرحوا جميعاً، وأخذوا يهنئون بعضهم البعض، فقامت (ماهيتاب) بعمل زغروطة كبيرة، فأقترب منها (سيف) وجذبها من يدها، وهو يهمس:

- بس يا ماهيتاب، إيه اللي بتعمليه ده؟

كان ذلك في نفس الوقت الذي إقترب فيه (عاصي) من (نرمين)، وهو يقول لها هامساً:

- على فكرة، أنا وفقت عليهم كلها عشان خاطرك انتي.

فترد (نرمين) بحرج:

- شكرا يا مستر عاصي، وإن شاء الله هنكون عند حسن ظن حضرتك.

فقال (عاصي)، وقد إقترب منها أكثر:

- لآ، مستر إيه؟ انتي تقولي يا عاصي على طول من غير مستر.

إرتبكت (نرمين)، فأقتربت من (سيف)، ومسكت يده - في محاولة منها للإحتماء به - وهي تقول له:

- مبروك يا حبيبي.

فيرد (سيف):

- مبروك علينا كلنا يا حبيبتي.

ضاقت عينا (عاصي)، وهو ينظر بضيق بعد أن لاحظ (نرمين وسيف)، ثم إقتربت منه (ماهيتاب) وهي

تقول:

- مش عارفة أشكرك إزاي يا أستاذ.

ثم إقتربت منه أكثر، وهي تكمل:

- مع أنك صغير أوي على أستاذ دي.

فابتسم (عاصي)، ووضع يده على كتفها، وهو يقول:

- م أنا بقول كده برضو، ههههههه.

كانوا سعداء جميعاً، ماعدا (رانيا) التي كانت تنظر ل (عاصي وماهيتاب) بغيرة وإنفعال شديدين.

(٧)

كانت (رانيا) تنهي عملها وتترك المكتب في حوالي العاشرة مساءً، بعدها كان (عاصي) كعادته يقوم بتحويل المكتب وكأنه ملهى ليلي صغير، حيث يقوم (عاطف) بتحضير السهرة من خلال إطفاء أنوار المكتب العادية، وأنارة الأضواء الخافتة، وإشعال بعض الفحم أيضا - لزوم القعدة والشيشة والحشيش والذي منه - كما تأتي بعض الفتيات اللاتي يظنن يرقصن حول (عاصي) طوال الليل في محاولة منهن لإرضاءه ليحن عليهن بمشهد أو إعلان أو كليب، وفي إحدى الليالي - وبينما كانت السهرة مشتعلة ع الآخر بسبب حنة الحشيش الجامدة أوي اللي جابها عاطف لعاصي - كان (عاطف) يرص الولعة على الحجر الثالث لشيشة (عاصي) الذي نظر له - بعينيه الحمازين وبحماس شديد وسط الدخان - وهو يقول:

- تسلم إيدك يا عاطف، الحنة النهاردة عالية أوي، خد دي مش خسارة فيك.

قالها وهو يعطيه في يده ورقة من فئة ال ١٠٠ دولار، فنظر له (عاطف) - وقد أحمرت عيناه أيضا - وهو يقول:

- إيه دي يا باشا؟

- دي ١٠٠ دولار، عارف يطلعوا كام؟

- يطلعوا كام يا باشا؟

- يعملولهم بتاع أربع تلاف جنيه.

لم يصدق (عاطف) نفسه من السعادة، وظل يرقص وهو يمسك الورقة بيده - وكأنه بينقط في فرح شعبي - وظل يدخن الحشيش، ويرقص مع الفتيات، ثم يتجرع البيرة فيزداد سعادة، وظل يرقص في وسط ضحكات الجميع ومن بينهم (عاصي) الذي أمسك هاتفه وقام بتصويره، وهو يرقص ويقفز كالقروء، ثم رفع الفيديو على مواقع التواصل الاجتماعي بعنوان:

((إتجنن وعمل حوار لما شاف ال ١٠٠ دولار))

(٨)

فى عصر اليوم التالى استيقظ (عاصي) من نومه ومسك هاتفه كعادته - فقد كان أول ما يفعله بعد الإستيقاظ هو تصفح مواقع التواصل الإجتماعي- فتفاجأ ولم يصدق نفسه عندما لاحظ الكم الهائل من المشاهدات والتعليقات والتفاعلات مع الفيديو، فخطرت على باله فكرة، فاتصل ب (عاطف) وأخبره أن يأتي له حالاً على الشركة، ثم قام وغير ملابسه وإنطلق نحو الشركة، وظل ممسكاً بهاتفه أثناء قيادة السيارة يتابع زيادة المشاهدات والتفاعلات بطريقة سريعة جداً، وهو مازال لا يصدق نفسه.

فى المكتب ظل (عاصي) ينظر ل(عاطف) فى صمت دون أن يتفوه بكلمة، مما أثار إستغراب (عاطف) الذى تساءل:

- خير يا باشا؟

إقترب (عاصي) منه وهو يقول بهدوء:

- خير يا ض، كل خير إن شاء الله.

إرتبك (عاطف) وهو يسأل مرةً أخرى:

- هو فى إيه بالظبط يا باشا؟

- مبروك يا ض يا عاطف، انت بقيت نجم

- نجم؟!، نجم إزاي يعنى يا باشا!!

- فاكور الورقة أم ١٠٠ دولار اللي اديتها لك إمبراح؟

- أيوه، إيه يا باشا انت هتاخدها منى تانى ولا إيه؟

- هههههه، لا يا عبيط، ده أنا هديك زيها وأكثر منها كمان.

- أنا مش فاهم حاجة بصراحة يا باشا.

- أفهمك، انت خلاص عديت وركبت التريند.

- ترينج إيه يا باشا لامواخذه!!

- التريند ياض، بص، أنا هعملك شوية فيديوهات زي الفيديو بتاع إمبراح، وكل م نعمل فيديو يركب التريند، هتاخذ عليه ورقة زي بتاعت إمبراح، إيه رأيك؟
- هي محتاجة رأي يا باشا، ههههه، يلا بينا نركب الترينج.
- حلو، بس في الأول كده في شوية أوراق عايزك تمضيلي عليهم.
- لم يتردد (عاطف) ولو للحظة واحدة، وهو يقول:
- عيونى ليك يا باشا البشوات، ده أنا أمضيلك وأبصملك كمان.

(٩)

- فى مطبخ الشركة كانت (رضا) الفراشة، تحضر فنجان القهوة ل (عاصي)، فدخل عليها (عاطف)،
واقترب منها ببطء ثم قال:
- وحشتيني يا بت يا رضا.
إلتفتت له وردت:
- وانت كمان وحشتني أوي يا عاطف.
إقترب منها أكثر، ثم مسك يدها وكاد أن يقبلها، فدفعتها من كتفه وهي تقول:
- إختشي يا واد يا عاطف إحنا فى الشركة.
وفجأة...
صاح (عاصي):
- ستوب، إيه ده يا عاطف ؟ أنا مش قولتلك تدخل تحضنها من ظهرها؟
- ميصحش يا باشا، أصل أنا ورضا لامواخدة يعني بنتكسف حبتين.
- لا ياض وانتو وش كسوف أوي، أومال مش بنتكسفو يعني وانتوا بتلهفوا مني الفلوس، إحضنها
ياض زي م قولتلك، وبعدين إيه رضا دي؟ قولها يارودي.. وانتى كمان قوليلو يا عطعط يا دولي.
- حاضر يا باشا
نظر (عطعط) ل (رودي) وهو يقول بصوت خافت:
- اتفكي شوية كده يا بت خلىنا نفقش القرشين، أهو ينفعوننا فى الجواز.
- حاضر يا أخويا.
وفى أثناء ذلك، كان (عاصي) يوجه الشاب الذي كان يحمل الكاميرا، وهو يقول:
- هتاخدكم بالكاميرا زاوية واسعة فى الأول، وبعدها تقربلي زووم على تعبيرات وشهم بعد الحضن.

ثم علا صوته وهو يقول:

- هاه، جاهزين، يلا، ٣، ٢، ١، أكشن

وبعد المونتاج، وإضافة بعض الموسيقى، تم رفع الفيديو على مواقع التواصل الإجتماعي بعنوان:

((الواد بتاع ال ١٠٠ دولار .. شغال ضرب ناار))

(١٠)

كان (عطط ورودي وعاصي والمصور) على حمام السباحة بفيلا (عاصي) الذي كان يشرح لهم ويشير بيده، وهو يقول:

- زي م فهمتكو بالظبط، هتقولها (بحبك يارودي)، هتردي تقويلو (وأنا مبحبكش)، وبعدها يا عاطف هترمي نفسك في حمام السباحة وتقولها (طب أنا هموت نفسي وأبقى شهيد حبك يارودي)، هتقومي انتي يا رضا تنطي وراه عشان تنقديه وانتي بتقولي (خلاص خلاص بحبك يا عطط يا دولي يا مجنون)، وبعدها تحضنو بعض، ماشي؟ يلا، ٣، ٢، ١، أكشن.

وبعد المونتاج، وإضافة بعض الموسيقى، تم رفع الفيديو على مواقع التواصل الإجتماعي بعنوان:

((الواد بتاع ال ١٠٠ دولار ... شغال زي المنشار))

(١١)

يقف (عطط ورودي وعاصي والمصور) أعلى برج القاهرة، ويقول (عاصي):

- هتقولها (بحبك يارودي)، هتقوليلو (انت فاجنتني، إديني فرصة أفكر)، هتقوم انت يا عاطف تعمل كأنك هترمي نفسك من هنا، وهي تيجي تلحقك على آخر لحظة وتقولك (خلاص بحبك يا عطط يا دولي)، وبعدها تحضنو بعض حضن كبير، فاهمين، حضن كبيبيير، يلا، ٣، ٢، ١، أكشن.

وبعد المونتاج، وإضافة بعض الموسيقى، تم رفع الفيديو على مواقع التواصل الإجتماعي بعنوان:

(شاهد قبل الحذف. الواد بتاع ال ١٠٠ دولار. نط من البرج بالنهار)

فى ريسبشن الشركة، جلس جميع الفريق، وبينما كان (سيف) يجلس مع (رانيا) على مكتبها - الذي كان فى الريسبشن - يتحدث معها حول فكرة جديدة لعمل فني كان قد بدأ كتابته مع (أيمن)، وصل (عاصي) ودخل من باب الشركة، فوقف (سيف) ليسلم عليه، وهو يقول:

- أستاذ عاصي، كنت محتاج أتكلم مع حضرتك، بخصوص فكرة جديدة أنا واثق إنها هتعجب حضرتك جدا.

رد عليه (عاصي) بإستهتار:

- بعدين يا سيف، بعدين.

ثم نظر نحو (نرمين) وهو يقول:

- صباح الفل.

- صباح النور يا مستر عاصي

ثم دخل إلى مكتبه، فاحتقن وجه (رانيا) التي دخلت خلفه، ثم قالت بضيق:

- إيه يا سي عاصي، وأنا مفيش صباح الفل ليا أنا كمان؟ ولا مش واخد بالك مني، ولا إيه؟

- يا حبيبتي صباح الفل والورد كمان، معلى حقاك عليا، أنا مرهق أوي النهاردة،

ثم أشعل سيجارة الحشيش، وهو يكمل:

- بقولك إيه، ابعيلي ماهيتاب.

- حشيش كده ع الريق؟ طب افطر الأول، وبعدين اشمعنى ماهيتاب اللي عايزني أبعتهالك؟

- مش طالبة الغيره بتاعتك دي خالص يا حبيبتي، ابعيلي ماهيتاب وهفهمك بعدين.

ردت (رانيا) بسخرية لا تخلو من الغيظ:

- حاضر يااا مستر عاصي، لما أشوف آخرتها معاك.

خرجت (رانيا) من المكتب، وأبلغت (ماهيتاب) التي فرحت جداً وانتفضت واقفة من مكانها وهي تقول:

- بجد، الأستاذ عايزني أنا؟

ثم جرت نحو مكتب (عاصي) الذي رحب بها ترحيباً حاراً، مع تبادل قبليتين على الخدين، ثم قالت
(ماهيتاب):

- أوامر يا أستاذ.

- بقولك إيه إحنا دلوقتي لوحدنا، سيبك من أستاذ دي بقى.

- أوامر يا قلبي.

فغمز بعينه، وهو يقول:

- أيوة كده تعجيبني، بصي بقى يا ماهيتاب، أنا جايبك إعلان من الآخر، هتبقى نجمة يا بت وهتركي
التريند.

اقتربت منه، ومسكت يده، وهي تقول:

- بجد يا عاصي، ربنا يخليك ليا وميحرمنيش منك أبداً.

كانت (ماهيتاب) تنظر لعين (عاصي)، بينما كانت عيناه تنظر لجسدها، وهو يقول:

- انتي قولتيلي إنك بتعرفي ترقصي، صح؟

- أو مااااا، ده أنا أعجبك أوي.

- حلو، طب م توريني حاجة بقى.

ضغط (عاصي) على زر الريموت، فاشتغلت الموسيقى، بينما كانت (ماهيتاب) تلخع طرحتها وتلفها
على وسطها استعداداً للرقص.

وفي الريببشن خارج المكتب انتبه الجميع بعد عدة دقائق لصوت الموسيقى الشرقية الذي ارتفع من
داخل المكتب، وخاصة (رانيا) التي عقدت حاجبيها ثم قامت مسرعة، وفتحت باب المكتب، فوجدت
(عاصي) الذي غمرته السعادة وهو ينظر ل (ماهيتاب) التي أبدعت في الرقص.

إرتبك (عاصي) قليلاً، ثم تماسك، وقال:

- تعالي يا رانيا، ده أحنا بنعمل بروفة ع الإعلان الجديد.

- اعلان ؟ اعلان إيه؟

- إقعدى بس وهفهمك بعدين.

ثم أكملت (ماهيتاب) وصلة الرقص، بينما جلست (رانيا) التي كانت تشتعل غضباً وهي تنظر

ل(عاصي) الذي كان يهز رأسه ويديه، وكاد أن يسيل لعابه وهو ينظر ل (ماهيتاب) التي كانت ترقص

وتتلوى كالأفعى الهندية على نغمات الرفاعي.

فى لوكيشن التصوير كان (عاصى والمخرج والعميل صاحب الإعلان) يجلسون أمام المونيتور، يشاهدون (ماهيتاب) وهى ترقص، وحولها عدد من الفتيات يمسكن جميعاً عبوات المنتج المعلن عنه بأيديهن - وقد كان المنتج عبارة عن أحد المقويات الجنسية للرجال - ثم مال (المخرج) على (عاصى)، وهو يقول:

- إيه ده يا عاصى، جبت الصاروخ ده منين؟ (يقصد ماهيتاب).

- يا باشا انت بس توامر، وأنا أجيبك قاعدة صواريخ، ههههه.

ضحك (المخرج)، ثم قال بعد ثوان بصوت مرتفع:

- ستوب، هايل، خلاص كده فركش يا جماعة.

جرت (ماهيتاب) على (المخرج)، وهى تقول:

- إيه رأيك يا أستاذ.

فيرد (المخرج):

- هايل يا نجمة، هو انتي إسمك أيه؟

رد (عاصى):

- إسمها ماهيتاب يا أستاذ.

قال (المخرج) وهو يلف يده على وسط (ماهيتاب):

- هايل يا ماهى.

نظر (عاصى) ل (ماهيتاب)، وغمز لها بعينه، وهو يقول:

- أوبأااا، طالما الأستاذ قال ماهى يبقى دخلتي دماغه وهخليكي نجمة بجد، مبروك يا ماهى.

ثم تركهما (المخرج)، فاقتربت (ماهى) من (عاصى)، ووضعت قبله على خده، وهى تقول:

- مش عارفة أشكرك إزاي يا عاصى؟

- أنا عارف تشكريني إزاي، وبعدين بوسة واحدة كده بس مش هينفع، أنا هستناكي بالليل في المكتب
عشان تشكريني بجد، وبعدها هحضرلك مفاجأة تانية، عشان تشكريني تاني، ههههههه.

بالفعل ذهبت (ماهي) في وقت متأخر من الليل إلى (عاصي) في مكتبه، وشكرته بالطريقة التي تناسبه،
ثم قام (عاصي) واعتدل في جلسته وقد ارتسمت على وجهه ملامح النشوة وهو يشعل سيجارة الحشيش،
ثم أخذ نفساً عميقاً، ثم نفث دخاناً كثيفاً من فمه، وهو يقول:

- الإعلان بتاع النهاردة ده هيكسر الدنيا، لازم بقى نستغل النجاح ده بشوية فيديوهات حلوة كده ع
السوشيال ميديا، ونعملك صفحة وقناة، ونظبطلك الفانز بتوعك يا نجمة، بس الأول عايزك تمضيلي
على شوية أوراق.

ثم إلتقط (عاصي) مجموعة أوراق من على مكتبه، وكانت تلك الأوراق عبارة عن عقد احتكار، ولم
تتردد (ماهي) لحظة وهي تمضي دون أن تقرأ أي بند من بنود العقد، بعدها أخذت (ماهي) سيجارة
الحشيش من يد (عاصي) وأخذت نفساً، ثم نفثته وهي تغمز بعينها وتقول :

- ده أنا كده فعلا لازم أشكرك تاني.

- تاني بس، ههههههه، ده تاني، وتالت، ورابع كمان، هو انتي عندك أعز مني يا بت؟

- هي هي هي، حبيبي يا أستاذ.



(١٤)

بعد عدة أيام في ريسبشن الشركة، كان (سيف) يجلس ممسكاً بيده ورقة وقلم، وكان يشرح مجموعة من الأفكار الفنية ل(أيمن ونرمين)، بينما كان (جمال) يتحدث في هاتفه، وكان (علاء) يجلس جانباً يدندن على جيتاره بصوت هادئ.

فتح (عاصي) باب مكتبه، ومعه (عطط ورودي) ليودعهما ويوصلهما لباب الشركة بنفسه كالنجوم، ذلك بعد أن مضا معهما عقود احتكار جديدة، وعلى باب الشركة بمجرد خروج (عطط ورودي)، تدخل (ماهي) فيستقبلها (عاصي) بحفاوة شديدة، وهو يقول:

- أهلا بالنجمة.

طبعت (ماهي) على خده قبلة، وهي تقول:

- أهلا يا عاصي

ثم التفتت نحو الجميع، وهي تقول:

- إزيكم يا شباب.

فيردوا عليها جميعاً ماعداً (سيف):

- أهلا يا ماهيتاب.

فقال (عاصي):

- لا، ماهيتاب إيه؟ ماهيتاب ده كان زمان، دلوقتي إسمها ماهي،

ثم وجه كلامه ل (ماهي) وهو يقول:

- استيني هنا دقائق يا نجمة هخلص حاجة كده، وتدخلي على طول.

ثم دخل إلى مكتبه، وبينما كانت (ماهي) جالسة في الريسبشن، كان (سيف) ينظر لها، وقد بدا عليه الغضب الشديد، وبعد ثوان قليلة لم يستطع أن يمسك غضبه، فقام من مكانه وتوجه نحوها، وهو يقول:

- أنا بجد مش قادر أستوعب إيه اللي بتعمله ده يا ماهيتاب؟

التفتت (ماهي) له، ورفعت أحد حاجبيها، وهي تقول

- إيه بعمل إيه؟

- متستعيطيش، انتي عارفة كويس أنا بتكلم عن إيه.

- بقولك إيه يا سيف، ملكش دعوة بيا خالص، خليك يا حبيبي في شكسبير بتاعك، وسبيني أنا أشوف

حالي.

إتسعت عينا (سيف) في ذهول بعد أن إمتزجت مشاعره ما بين الإحراج والغضب، فإقتربت منه

(نرمين)، وجذبتة من ذراعه وهي تقول:

- خلاص يا سيف، سيبها براحتها، ماهيتاب عارفة طريقها من الأول ومحدداه كويس.

فرد (سيف) بسخرية لا تخلو من الغيظ:

- ماهيتاب إيه بقى، قصدك ماهي.

نظرت (ماهي) لهما بلا مبالاة، ثم إتجهت نحو (علاء) - الذي كان ينظر لها بخجل - وقالت:

- إزيك يا علاء؟

تردد (علاء) وهو يقول:

- إزيك ياااا، أقول ماهيتاب، ولا أقول ماهي؟

- انت تقول اللي انت عايزه، ده انت حبيبي يا علاء، ولا نسيت اللي بينا؟

ظهرت السعادة على ملامح وجه (علاء)، وهو يقول:

- أنسى إزاي بس؟ أنا أقدر أنساكي يا حبيبي؟ ده انتي اللي نسيتيني، انتي خلاص بقيتي نجمة، وأنا

يعني مبقتش قد المقام، أصل ...

قاطعته (ماهي)، وقد وضعت يدها على يده:

- بقولك إيه، أنا عايزاك معايا، هنعمل دويتو هيكسر الدنيا.

- مش فاهم قصدك.

- بقولك هنعمل دويتو، هتطلع معايا وأنا برقص، ونغني سوا.

إرتعش (علاء) وهو يقول:

- انتي بتقولي إيه؟

- يا واد إسمع كلامي، انت صوتك حلو، والفرصة مش بتيجي غير مرة واحدة.

فكر (علاء) قليلاً، ثم قال وهو ينظر نحو (سيف) الذي خرج إلى البلكونة ليدخن سيجارة:

- طب وسيف؟

- سيف إيه وزفت إيه؟ ملكش دعوة بسيف ده خالص، خليه هو يا أخويا في الجنان بتاعه، وخلينا

إحنا نشوف نفسنا، أنا داخلة لعاصي دلوقتي وهقوله ع الفكرة، وأنا عارفة أنه هيوافق وهيجهزلك

العقود كمان.

- طبعا، م هو ميقاش يرفضك طلب دلوقتي.

- يووووه، متحبكهاش بقى يا علاء.

وبالفعل مضى (علاء) عقد احتكار مع (عاصي)، بعدها قام (عاصي) بعمل كليب مهرجان ل(علاء

وماهي)، إرتدت فيه (ماهي) بدلة رقص ساخنة، وقد حقق مشاهدات خيالية - بصرف النظر عن كلماته

المبتذلة - بعدها بدأت عروض الحفلات والأفراح تنهال عليهما.

بعد عدة أيام، في ريسبشن الشركة، كانت (رانيا) تجلس على مكتبها، وكان (سيف) مجتمعاً مع (أيمن ونرمين) يناقشهما في بعض الأفكار الفنية كعادته، وكان (جمال) يتحدث في هاتفه كعادته أيضاً، فإذا ب(علاء وماهي) يدخلان من باب الشركة، فالتف الجميع - فيما عدا سيف- حول (علاء) يهنئونه بالكليب الجديد، ثم جاءت عينه في عين (سيف) الذي لم يتحرك من مكانه، فاقترب منه (علاء) وهو يقول:

- إزيك يا بروف؟

- أهلا يا علاء، مبروك.

- مالك يا بروف بتقولها لي من غير نفس ليه كده؟ ده بدل م تفرحلي؟

- أفرحك؟!، أفرحك بيايه يا علاء؟ انت مقتنع باللي انت بتقوله ده؟

- يا بروف ما هي الفرصة مش بتيجي غير مرة واحدة، وانت اللي علمتنا انها لما تيجي لازم نستغلها صح، مش ده كلامك؟

- أيوه فعلا ده كلامي، بس دي مش فرصة أصلاً يا علاء، هو انت متخيل إن اللي انت فيه ده اسمه نجاح؟ ده هو ده الفشل بعينه.

صمت (علاء) وصرف نظره عن (سيف)، ولم يستطع النظر في عينه، فأكمل (سيف):

- يا علاء إفهم، انت فنان بجد وصوتك حلو، وأنا قولتلك الكلام ده أول م شوفتك.

- عارف يا بروف، وانت اللي شجعتني ودربتني، وأديني بنجح أهو، إفرحلي بقى.

- قولتلك اللي انت فيه ده مش نجاح، يا علاء أصبر شوية لحد متلاقي فرصة حقيقية، خسارة يا ابني تحرق نفسك في الكلام الفارغ ده.

- م إحنا صابرين بقالنا سنين وموصلناش لحاجة، وبعدين خلاص بقى ملوش لازمة الكلام ده، والنبي يا بروف ما تبوظ فرحتي.

- براحتك يا علاء، بس خليك فاكرا كلامي كويس، اللي انت فيه ده فشل مش نجاح.
ثم تركه (سيف) ودخل البلكونة بعصبية ليشعل سيجارة، فنظر له (علاء) وهو يحدث نفسه ويقول:
- متحبكهاش بقى يا عم سيف.
ثم أدار رأسه، فوجد (أيمن) يجلس وفي يده ورقة وقلم وهو يفكر- ويبدو أنه يكتب قصيدة جديدة -
فأقترب منه وهو يقول:
- شاعرنا الجميل
- حبيبي يا نجم، ألف مبروك يا علاء، والله فرحتك أوي.
تعجب (علاء) من ردة فعله، ثم قال:
- بجد يا أيمن؟!، أومال إشمعنى سيف مش فرحانلي؟
- م انت عارف سيف، هو في دماغه شوية أفكار ومبادئ معينة عمره م هيتنازل عنها.
- بس انت طول عمرك بتفكر زيه، طول الوقت كنت بحس أن انتو الأثنين واحد.
- سيف حبيبي وأخويا وعشرة عمر، بس واضح إن طريقته بقت قديمة شوية، والدنيا حوالينا بقت
بتتطور زي م انت شايف.
إزداد تعجب (علاء) من كلمات (أيمن)، فصمت قليلاً، ثم قال:
- بصراحة يا أيمن، كلامك ده هيشجعني أطلب منك طلب، م كونتش عارف أطلبه إزاي؟
- عيوني يا حبيبي.
تردد (علاء) قليلاً، ثم تحمس وقال:
- بص يا عم أيمن، أنا عامل لحن لمهرجان هيكسر الدنيا، وبصراحة كنت عايزك تركبلي عليه شوية
كلمات كده من كلماتك الحلوة يا فنان.
لم يتفوه (أيمن) بكلمة، ونظر نحو (سيف) - الذي مازل واقفاً في البلكونة يدخن سيجارته - وظل صامتاً،
فأقترب منه (علاء) في تودد محاولاً إقناعه، وهو يقول:
- يا صاحبني سيبك من سيف، م انت لسة قايل ان أفكاره بقت قديمة، وان الدنيا حوالينا بتتغير.

ظل (أيمن) صامتاً، فأكمل (علاء):

- علينا النعمة هندغدغ الدنيا أنا وانت، وبعدين عاصي بيدفع كتبير، إسمع مني.
- مش مسألة يدفع كتير ولا قليل، انت عارف كويس ان الفلوس متفرقش معايا، أنا كل اللي يهمني إننا نقدم فن هادف، واللي انت بتقول عليه ده

قاطعته (علاء):

- يا عم فكك بقى من الشعارات بتاعت سيف دي، واسمع كلامي وخلينا نقب على وش الدنيا.

تررد (أيمن) قليلاً، ثم قال:

- طب سمعني اللحن كده.

فرح (علاء)، وقفز من كانه، وهو يقول:

- أيوة كده يافنان، هو دة.

وبينما كان (علاء) يندندن اللحن دخل (عطط ورودي) من باب الشركة وكانت معهم (شوقية) - والتي كانت قد ظهرت معهم في اللايف الأخير، وقد بدأت بعمل بعض اللايفات الخاصة بها، وبدأ يظهر لها جمهور بسيط (فانز)، وقد جاءت اليوم ل(عاصي) ليتعرف عليها - فقام (علاء) ليسلم عليهم، وهو يقول:

- أوبا بقى، عطط نجم النجوم.

- حبيبي يا شقيق.

ثم نظر (عطط) لأيمن، وهو يقول:

- أيمن باشا. إزيك يا باشا؟

- أهلا يا عطط.

ثم نظر (عطط) ل (سيف) الواقف في البلكونة، وقد علا صوته، وهو يقول:

- إزيك يا أستاذ سيف؟ منور الدنيا كلها.

إلتفت (سيف) إلى مصدر الصوت، فوجده (عطط)، فقال بغیظ، وهو یطفئ سيجارته ويشعل سيجارة أخرى:

- أهلا يا عاطف.

فقال (عطط) في نفسه:

- عاطف؟!، ههههه، ماشي؟

ثم إلتفت إلى (رانيا)، وهو یقول:

- صباح الفل يا أستاذة؟

نظرت له (رانيا) بإشمئزاز، وهي تقول:

- أهلا.

- عندنا معاد مع عاصي باشا.

- تمام، هدخل أبلغه.

قامت (رانيا) وفتحت باب المكتب، فوجدت (ماهي) جالسة على قدم (عاصي)، فإتسعت عيناها وهي تنتظر ل (ماهي) التي شعرت بالحرج، ثم قامت، وخرجت من المكتب، فنظرت (رانيا) ل(عاصي) بحدة، وهي تقول:

- إيه ده؟

- أستني يا رانيا متفهميش غلط؟

- بقولك إيه اللي أنا شوقته ده؟

في نفس الوقت في الريبشبن، كانت (شوقية) تنتظر نحو(سيف)، ثم دخلت له في البلكونة، ثم قالت بخجل:

- إزيك يا أستاذ سيف؟

تفاجأ (سيف) من وجود (شوقية)، فرد عليها بإستهزاء:

- أهلا شوقية، إزيك؟

- بخير الحمد لله، يارب حضرتك تكون بخير.

- وانتى إيه اللي جابك هنا بقى؟ عايزة تعملي فيديوهات وتبقي نجمة انتى كمان ولا إيه؟

إرتبكت (شوقية) وهي ترد:

- يعني، أنا قولت أجرب حظي أنا كمان، وأهو أبقي مع عطط أخويا.

فنظر (سيف) بإستهزاء نحو (عطط) في الداخل، وهو يقول:

- عطط آه.

ثم لمح (سيف) (علاء وأيمن) وهما جالساًن يغنيان سوياً ويحاولان تركيب كلمات على اللحن، فترك

(شوقية) - التي شعرت بالحرج - ودخل وهو ينظر ل(أيمن) بعصبية شديدة وقال بحدة:

- انت بتعمل إيه؟

إرتبك (أيمن)، وقد أخفى ورقة الكلمات وراء ظهره، وهو يقول:

- مبعملش حاجة يا سيف. إهدى.

أخذ (سيف) الورقة من يده ونظر لها، ثم صرخ وقال:

- اهدى إيه، إيه ده؟ خلاص، عمالين تتنازلو كلكم واحد ورا التاني، عاصي اشتراكم كلكم بالفلوس؟

- يا سيف اهدى عشان أشرحلك.

- يا عم ولا تشرحلي ولا زفت.. أنا ماشي وسايبهالكوا خالص.

تدخل (عطط):

- متصلي ع النبي يا سيف، في إيه؟

إلتقت (سيف) ل (عطط) وقد إزداد غيظاً، ورد عليه متعجباً:

- سيف !!! لا مفيش حاجة يااااا.. يا أستاذ عطط يا دولي.

ثم تركهم وخرج من الشركة، وكانت (نرمين) تحاول أن تخرج خلفه، لكن (جمال) أمسكها من يدها،

وقال لها في خبث:

- سيببه دلوقتي يا نرمين، هو هيهدى مع نفسه وهيرجع تاني.

خرجت (شوقية) وراء (سيف) على السلاالم، وقالت:

- أستاذ سيف؟

توقف (سيف) وإلتفت لها في ضيق:

- ايوة يا شوقية.

- معلىش إني بتدخل، بس ممكن تهدي شوية.

أعطاه ظهره لينزل على السلاالم، وهو يقول:

- ماشي يا شوقية، شكرا

مسكته من ذراعه، فإلتفت لها مرةً أخرى متعجباً، ثم قالت:

- استنى، أنا عارفة انت مضايق من إيه، عارفة كمان إنك فنان بجد، بس معلىش حاول تيجي على

نفسك شوية.

إستغرب (سيف)، ورفع حاجباه بدهشة، وهو يقول:

- نعم؟

- أنا بتكلم عشان مصلحتك، لازم تتنازل شوية في الأول، وبعد كده كل حاجة هتبقى زي م انت عايز.

ثم إقتربت منه ووضعت يدها على يده وهي تقول:

- صدقني يا سيف.

نظر لها في ذهول، وقد إتسعت عيناه، فاهتزت وتركت يده وتراجعت للوراء قليلاً، وهي تقول:

- قصدي يا أستاذ سيف.

- انتي إيه اللي بتقوليه ده؟!، انتي نسييتي نفسك ولا إيه؟ وانتي مالك أصلاً؟

- أنا آسفة مش قصدي والله،

ثم نزلت دمة من عينها، وهي تكمل:

- لا يا أستاذ سيف، أنا منستش نفسي ولا حاجة، أنا فاكرة كويس أن حضرتك الأستاذ سيف، وان أنا شوقية بنت البواب....

قاطعها (سيف)، وهو يحاول أن يهدئ من روعه، ويجبر بخاطرها في نفس الوقت:

- أنا آسف يا شوقية، أنا مش قصدي حاجة، أنا بس مخنوق شوية ومش قادر أتكلم مع حد دلوقتي، لو سمحتي متعيطيش، وأنا آسف مرة ثانية.

ثم تركها ونزل على السلام، فدخلت الشركة مرة أخرى، فوجدت (رانيا) التي بدت عليها آثار الصدمة، وهي تخرج من مكتب (عاصي) وتقول:

- عطط ورودي وشوقية، إتفضلوا، مستر عاصي في انتظاركم.

بعدها نظرت (رانيا) نحو (سيف) في البلكونة، فلم تجده، فسألت الجميع:

- أو مال فين سيف؟

ردت (نرمين):

- إتخاقت مع أيمن وعلاء ومشى.

جرت (رانيا) مسرعة نحو البلكونة، ونظرت بحزن شديد للشارع نحو سيف الذي أدار سيارته - فيات ١٢٧ حمراء - وتحرك سريعاً.

كان ذلك في نفس الوقت الذي دخل فيه (عطط ورودي وشوقية) إلى (عاصي) في مكتبه

- أهلاً وسهلاً، مين القمر اللي معاك ده يا عطط؟

- دي أختي شوقية يا باشا اللي حكيتك عنها، عايزين نظبطها كده ونركبها معانا الترينج، وأهو البركة فيك بقى يا باشا.

- أهلاً يا شوشو.

إنزعجت (شوقية) ونظرت ل(عاصي) بإشمئزاز:

- شوقية، إسمي شوقية.

رد (عطط) سريعاً:

- خلاص بقى يا شوشو، طالما الباشا قال شوشو ببقى شوشو.

وفى أثناء ذلك، خارج المكتب فى الريسبشن، جلست (رانيا) على مكتبها، وقد إرتسمت على وجهها

ملامح الحزن والأسى، فلاحظها (أيمن)، ثم توجه نحوها، وقال:

- لو أعرف بس القمر زعلان ليه؟

- هو انت مبتزهقش يا أيمن؟

قالتها (رانيا) بعصبية، ثم أخذت شنطتها، وخرجت من باب الشركة.

كان (سيف) يعشق النيل، وكان كثيراً ما يذهب ليجلس ساعات طويلة أمامه، خاصةً في أوقات ضيقه وحزنه، وكان عادةً ما يجلس وحده، ولكن في بعض الأحيان كان يجلس معه (أيمن)، وبعد أن خرج (سيف) من الشركة وهو غاضباً، تحرك سريعاً نحو منطقة المنيل، ووقف بسيارته على النيل في مكانه المعتاد، ونزل منها ثم وقف أمام النيل وسرح بخياله، فتذكر حديث قديم بينه وبين (أيمن):

- متقلقش يا سيف، طول م إحنا عندنا رسالة، وعايزين نقدم فن محترم، ربنا هيكرمنا.

عاد (سيف) من سرحانه إلى واقعه مرةً أخرى، وقال لنفسه بحسرة:

- يا خسارة، ليه بس كده يا أيمن؟!.



(١٧)

بعد أن خرجت (رانيا) من الشركة جلست في سيارتها، ثم مسكت هاتفها وكانت تنظر على الشاشة لرقم (سيف) تريد ان تتصل به، ولكنها ترددت، وبدأت تسأل نفسها هل بدأت تشعر بالإعجاب نحو (سيف)، أم أن ذلك مجرد نوع من أنواع التضامن والتعاطف معه فقط.

وفي أثناء ذلك رن هاتفها وظهر على الشاشة إسم (مروان برودكشن) - كان (مروان) صديق قديم ل (رانيا)، وكثيراً ما كان يعرض عليها أن تأتي للعمل معه في شركة الانتاج الفني الضخمة التي يعمل بها، ولكنها دائماً كانت ترفض لتظل بجانب (عاصي) - لم ترد على الهاتف، وبعد أن انتهى الرنين، نظرت مرةً أخرى نحو الشاشة على إسم (سيف)، ومازالت مترددة في الإتصال به.

(١٨)

في نفس الوقت كان (عاصي) جالساً على مكتبه وأمامه (شوقية) - بعد أن خرج (عطط ورودي) - ثم إقترب (عاصي) منها، وهو يقول:

- وانتي بقى بتعرفي تعملي إيه يا حلوة؟

شعرت (شوقية) بالتوتر، فتراجعت للخلف قليلاً، وهي تقول:

- مش فاهمة قصد حضرتك؟

- يعني بترقصي؟ ولا بتعني؟ ولا بت....

قالها وهو يضع يده على كتفها بعد أن إقترب منها أكثر، وكاد أن يقبلها، فصفعته على وجهه وهي تصرخ:

- إيه اللي بتعمله ده يا حيوان؟

وضع يده على وجهه وتحسس أثر الضربة، ثم نظر ليدته، فوجد دم من خدش بسيط من أثر أظافرهما، فغضب بشدة وإحمر وجهه، وهو يقول:

-أنا حيوان يا بنت البواب؟ وكمان بتمدي إيدك عليا، ده جزائي إني عايز أنضفك زي م نضفت أخوكي، ولا انتي فاكرة ياروح أمك إنك هتنصفي كده ببلاش؟

بصقت على وجهه، وخرجت مسرعة من باب المكتب وهي تبكي، فلمحها (عطط) الذي كان جالساً في الريسبشن، فجرى نحوها، وجذبها من ذراعها وهو يسأل:

- في إيه يا بت؟ مالك؟

- مفيش يا عاطف، لو سمحت سبني أمشي من هنا.

ثم جرت وخرجت من باب الشركة، فغلت الدماء في عروق (عطط) الذي إقتحم مكتب (عاصي) وهو يسأل بإنفعال:

- م تفهمني في إيه يا عم عاصي؟

رد (عاصي) بهدوء محاولاً أن يخفي توتره:

- مفيش حاجة يا عطط، إقعد وهفهمك.

لمح (عطط) الجرح على خد (عاصي) فجن جنونه، وجذبه من قميصه وهو يسأله بحدة:

- تفهمني إيه؟ وإيه الدم اللي على وشك ده؟

مسكه (عاصي) من ذراعاه وهو يقول:

- نزل إيدك ياض، ومتنساش نفسك، وإعرف انت بتكلم مين.

- بكلم مين يعني؟ عيل فرفور وشمال ولا ليك أي لازمة، إسمع ياض، لو فكرت تقرب من شوقية تاني

عليا الطلاق هعملها معاك، ومن النهاردة انت من طريق وأنا من طريق.

ثم تركه وخرج من المكتب، فصرخ (عاصي):

- هتجيلي تاني يابن البواب، هتجيلي تاني انت وأختك تبوسو إيدي، انت ماضي عقد احتكار يالا ولا

نسيت؟

بعد عدة أسابيع كان (سيف) يجلس في كافيته مع (نرمين) وهو مازال مصدوما وبدا عليه الحزن الشديد وهو يقول:

- أنا مش قادر أصدق إزاي يعملوا كده؟ طب ماهيتاب ممكن، لكن علاء إزاي؟ وحتى أيمن اللي كنت بعنبره أقرب واحد ليا؟ أنا بجد مش قادر أصدق.

- يا حبيبي انت لازم تهدي شوية مش كده، وبعدين اللي حصل ده يوضحك أن الواحد لازم يتنازل شوية عشان المركب تمشي.

- قصدك إيه يا نرمين؟

- قصدي ان الدنيا بتتغير واحنا لازم

- متكلميش يا نرمين، ولو سمحتي متكلميش معايا في الموضوع ده تاني، والكلب اللي أسمه عاصي ده أنا خلاص عمري م هروحله الشركة تاني.

- طيب وهنعمل إيه دلوقتي بعد م كل الفريق سابنا وبقي مع عاصي.

- بصي، أنا بقالي كام يوم بفكر في حاجة كده.

- بتفكر في إيه؟

- إحنا هنعمل قناة ع اليوتيوب، وهنقدم فيها محتوى فني، بس تعليمي في نفس الوقت، وإن شاء الله ربنا هيكرمنا، وهنثبتلهم أن الفن الحقيقي الهادف هو اللي هينجح.

(٢٠)

فيديو ع اليوتيوب بعنوان:

((نهاية عصر البطالمة في مصر))

ويظهر في الفيديو (سيف ونرمين) يجسدان شخصيتي أنطونيوس وكليوباترا في مشهد تمثيلي رائع - ولكن الصورة كانت سيئة جدا، حيث أن الكاميرا كانت رديئة، مع عدم وجود مايكات للصوت أو معدات إضاءة - ثم يظهر (سيف) في آخر المشهد وهو يجلس على كرسي ويلقي محاضرة تاريخية حول نهاية حكم البطالمة في مصر وبداية عصر الرومان، وتظهر مشاهدات ضعيفة جدا لا تتعدى ١٠٠ مشاهدة.

(٢١)

أصبحت (شوشو) - التي كانت (شوقية) - تسجل فيديوهات لايف وهي تتحدث عن العلاقات العاطفية وعلاقتها بما يسمونه علم الأبراج والأجرام السماوية، وبمرور الوقت أصبحت تحصل على مشاهدات وتفاعلات كثيرة، وأصبح لها جمهور (فانز) كبير.

(٢٢)

على قائمة التريند - الأعلى مشاهدة في الوطن العربي - تربع كليب جديد ل(ماهي وعلاء) ويظهر في آخر الكليب أن الأغنية من كلمات (أيمن).

فى المكتب إجتمع (عاصي) ب(علاء وأيمن وماهى وجمال)، وقال:

- بصو يا شباب، أنا عندي فكرة جامدة جداً، هتخلينا راكبين التريند الفترة الجاية كلها.

رد (جمال) بحماس شديد:

- قول يا أستاذ قول.

- انت يا جمال هتكتب على موقع الجريدة بتاعتك خبر بعنوان ((ماهى تترك علاء وترتمي فى أحضان

كاتب أغانيه أيمن))

إعترض الجميع على الفكرة ما عدا (جمال) الذي بدأ متحمساً، وهو يقول:

- بالعكس دي فكرة جامدة جداً، جبتها منين دي يا أستاذ؟

يصر (علاء) على إعتراضه، فيرد عليه (عاصي):

- يا عم علاء متقلقش، يومين كده ونطلع بتريند جديد بعنوان ((ماهى تشعر بالندم وتعود لأحضان

علاء مرةً أخرى)).

وفى نهاية الحديث إقتنع الجميع، وكانت حقاً فكرة شيطانية من (عاصي) الذي إستطاع من خلالها أن

يتربع على عرش التريند لأكثر من شهر كامل.

(٢٤)

بعد عدة أسابيع، إجتمع (عاصي) في مكتبه مع (أيمن وعلاء وماهي وجمال) مرةً أخرى يحتفلون معا بصعودهم التريند، ثم إلتفت (عاصي) ل(جمال)، بعد أن فتح الخزنة وأخرج رزمة من الأموال وأعطها له، وهو يقول:

- جدع يا جيمي، خد دول مش خسارة فيك.

- تسلم إيدك يا أستاذنا.

- أومال فين نرمين؟ مش باينة يعني؟

- نرمين مش بتيجي الشركة خالص من ساعة خناقة سيف مع أيمن وعلاء.

- البت نرمين دي جامدة أوي، عايزك نجيبها نولع بيها التريند، انت مش قولت إنها بنت عمك؟

إحتفن وجه (ماهي)، كما إرتسمت ملامح الضيق على وجه (جمال)، وهو يقول:

- بقولك إيه يا أستاذ عاصي، نرمين مش بتاعت الكلام ده.

- مالك يا عم جمال، في إيه؟ هو أحنا هناكلها؟

- لو سمحت طلع نرمين من حوارتنا دي خالص.

إبتسم (عاصي)، وهو يقول بسخرية:

- إيه ده، انت بتغير عليها؟ هو انت بتحبها ولا إيه يا جيمي؟

تردد (جمال) قليلاً، ثم تشجع وقال:

- أيوة بحبها.

ضحك (عاصي) بصوت عالي، وهو يقول:

- بتحبها إزاي يعني لا مؤاخذة؟ دي بتحب سيف يا ابني، ولا انت مش واخذ بالك؟

إزداد شعور (جمال) بالضيق، فأكمل (عاصي) وهو مازال يضحك:

- آآآآآآه، فهمتك، حب من طرف واحد يعني.

إحمر وجه (جمال) وكادت عروقه أن تنفجر، فقام (عاصي) من على مكتبه وإقترب منه، وهو يقول
بخبث:

- تصدق يا جيمي انت صعبت عليا، بص بقى، الطريقة الوحيدة اللي هتخلي نرمين تسبب سيف
وتجيك، إنك تفضل تلعب في دماغها وتزن عليها لحد م تجيبها هنا، ونركبها التريند يا معلم، ساعتها
بقى هتحس إنك انت اللي ساعدتها، ووقفت جنبها في طريق النجومية، وحققناها أحلامها، وهتبقى
بتاعتك، وهتفض خالص للواد اللي اسمه سيف ده.

إلتمعت عين (جمال) بعد أن راقت له كلمات (عاصي)، في نفس الوقت الذي اعترض فيه (أيمن) بشدة،
فرد عليه (عاصي) بحزم:

- ملكش دعوة انت يا أيمن بالليلة دي وخليك في شغلك، ومتدخلش في اللي ملكش فيه عشان مزعلش
منك، وأنا زعلي وحش.

خرج (جمال) من المكتب، ووقف في البلكونة، ثم مسك هاتفه وإتصل ب (نرمين):

- ألو، إزيك يا نرمين، وحشتيني

- أهلا يا جمال.

- فينك مش باينة ليه؟ على فكرة الأستاذ عاصي بيسأل عليك عشان عايزك في شغل هيعجبك أوي.

- بصراحة يا جمال أنا مش برتاح للي اسمه عاصي ده، ومش عايزة آجي الشركة دي تاني، وبعدين

أنا مشغولة جدا الفترة دي بسبب الفيديوهات بتاعتي أنا وسيف، صحيح انت متابع القناة بتاعتنا ع

اليوتيوب ولا لا؟

رد عليها بسخرية:

- آه طبعا، مش دي القناة اللي فيها ١٣٤ مشترك.

انتعشت نيرة (نرمين) وهي تقول:

- إيه ده هما بقو ١٣٤؟ كويس أوي ده لحد إمبراح كانو ١٣٢ بس.

- هو انتي مصدقة نفسك يا نرمين؟

- قصدك إيه يا جمال؟

- قصدي ان سيف بتاعك ده مش هينفعك بحاجة، بقالكو شهور بتنزلو فيديوهات وفي الآخر ١٣٤

مشارك، يابنتي هنا مع عاصي هتجيبى ملايين المشاهدات ومن أول فيديو.

- أيوة بس الطريقة بتاعة عاصي ده.....

قاطعها (جمال)، وقال لها بهدوء لا يخلو من الخبث:

- فكري بس على مهلك، وأنا هكلمك تاني كمان كام يوم.

(٢٥)

- فى مكتب (عاصى)، دخلت السكرتيرة الجديدة - بدلاً من رانيا التى تركت عاصى ولم تعد تعمل معه فى الشركة - وقالت ل(عاصى):
- كده يبقى بقالو ساعتين منتظر حضرتك برا.
- كفاية عليه كده، خليه يدخل.
- دخل (عطعط) المكتب، وإرتسمت على وجهه إبتسامة كبيرة، وهو يقول:
- الباشا الكبير، وربنا وحشنى، إوعى تكون لسة زعلان منى يا باشا؟
- مال (عاصى) بظهر كرسيه للوراء، ثم وضع قدمه على المكتب - فى وجه عطعط - وهو يقول:
- مش قولتلك هترجع.
- حقك عليا يا باشا، والله اللى حصل ده كان غضب عني، أنا بس إتجننت لما لقيت البت شوقية بتعيط، إفتكرت فى حاجة كده ولا كده لا سمح الله.
- وإيه اللى رجعتك؟
- الحالة بقت صعبة أوي يا باشا، وأنا مليش بركة إلا انت، وأنا جايلك أهو لحد عندك، ومستعد أحب على أيدك بس ترضى عليا.
- ثم إقترب من (عاصى)، وقبل يده، وهو يكمل:
- وأدي أيدك أبوسها أهو يا باشا، والنبي يا باشا تشوفني فى أي مصلحة، لحسن د أنا مأشفر ع الآخر، والحالة ضنك.
- بس كده؟ عينيا، انت عارف ياض إني بحبك، مع إنك إبن كلب رمة، بس بحبك
- ههههههههه، تسلملى يا باشا.
- أومال فىن شوشو؟
- شوقية؟ شوقية خلاص ربنا فتح عليها وفيديوهاتها مكسرة الدنيا وبقي ليها جمهورها.

- منا عارف، عشان كده عايزها معايا.
- أحننا مالنا بشوقية بقى يا باشا؟ م تخليها هي من طريق وإحنا من طريق.
- إسمع بقى، هتجيبلي شوشو، يبقى في شغل، مفيش شوشو، يبقى مفيش شغل، وده آخر كلام عندي.
- حاضر، اللي تشوفه ياكبير.

ذهب (عطط) ل(شوشو) في شقتها الجديدة، وجلس في الصالة يتأمل الجدران والأثاث، ثم فتح فأه وإنبهر وهو ينظر نحو الركن الخاص بمعدات التصوير والإضاءة التي تستخدمها (شوشو) في الفيديوهات واللايفات، ثم نظر لها وقال:

- اش اش، إيه الحلاوة دي اللهم صل ع النبي، ربنا يوسع عليك يا أختي.
- م أنا قولت لأبوك يسببه من شغل العمارة، ويجي يقعد معايا هنا، بس هو اللي مرضيش، مفكرني شغالة في الحرام.
- حرام إيه أعوذ بالله، ده تعبك وشقاكي يا حبيبتى، ربنا يزيدك.
- تسلم يا حبيبي.
- طب وأخوكي حبيبك هتفضلي رمياه كده؟
- منا ببعتك كل شهر يا عاطف، هو أنا بستخسر فيك حاجة؟
- تسلميلي يا أختي، بس الدنيا ضيقة أوي، ويادوب اللي جاي على قد اللي رايح.
- حاضر، هخش أجيبك فلوس من جوة.
- لا يا أختي مش قصدي.
- أومال عايز إيه يا عاطف؟ إخلص.
- أنا بصراحة كده عايزك تيجي معايا عند عاصي باشا.
- إيه؟ بعد اللي حصل ده؟ مستحيل.
- والنبي يا حبيبتى، ده أنا صدقت إنه يرضى عليا وهيشغلني معاه تاني، خليني أقب على وش الدنيا زيك.
- وأنا صدقت إنى أبطل شغل شمال وأبقى إنسانة محترمة.

تغيرت ملامح (عطط)، و علا صوتة، وهو يسألها:

- شمال؟ شمال إيه يا بت اللي كنتي شغالة فيه؟

- أيوة يا أخويا كنت شغالة في الشمال.

ثم إرتسم الحزن على ملامح وجهها، وهي تكمل:

- أومال انت فاكرنى كنت بصرف على نفسى إزاي طول السنين اللي فاتت؟ وكملت علام منين؟

إتسعت عيناه وجذبها من شعرها، وهو يقول:

- يانهار أبوكى أسود، أومال يعني بروح امك عملتي نفسك شريفة ليه مع عاصي، م كنتي إعتبرتية

واحد من زباينك يافاجرة.

أزاحت يده من عليها، وقد ذرفت دمعة من عينها وهو تقول:

- مفيش الكلام ده يا عاطف، أنا لو فعلا شمال كنت مشيت أموري مع عاصي زي م انت بتقول، لكن

أنا محترمة وهفضل محترمة، أنا لسة بنت بنوت، دي بس كانت حاجات خفيفة كده كنت بمشي بيها

حالي عشان أجيب القرشين، ولا كان عاجبك العيشة اللي كنا عايشنهما؟

دمعت عين (عطط) وهو يقول بأسى:

- تقومي تببعي نفسك يا شوقية؟

- والله أبدأ، محصلش أكثر من اللي قولتلك عليه ده، وبعدين أنا خلاص بطلت وربنا يعلم، وأهو ربنا

وسعها عليا، متودنيش عند جاسر ده تاني والنبي يا عاطف.

بكى (عطط)، ثم إحتضنها بقوة، وهو يقول:

- حقك عليا يا أختي، أنا السبب، أنا اللي قصرت معاكى، أنا الراجل، والمفروض إنك ملزمة منى.

- متلومش نفسك يا أخويا ومتحملهاش فوق طاقتها، وعموما أهو الحمد لله ربنا كرمنى، وعوضنى

خير.

(٢٧)

فى المكتب جلس (عطط) أمام (عاصي) وقال:

- يا باشا مش راضية، أعملها إيه يعني؟ وبعدين يا باشا م إحنا كنا شغالين من غيرها عادي وكانت

الدنيا زي الفل، وكان أحلى شغل وكانت أحلى فلوس، إيه اللي جد يعني؟

- بقولك إيه يا ض انت، متكلش دماغي وتصدعني معاك، أنا قولتهالك قبل كده وهقولتهالك تاني، فى

شوشو يبقى فى شغل، مفيش شوشو يبقى مفيش شغل.

غضب (عطط)، وعلا صوته، وهو يقول:

- هو فيه إيه يا باشا؟ هو انت عايز منها إيه بالضبط؟

صرخ (عاصي) وهو يقول:

- جرى إيه ياروح امك، هي هتهب منك وهتنسى نفسك تاني ولا إيه؟

- يا عم لا تاني ولا تالت، وعلى رأي المثل، بين البايع والشاري يفتح الله، أنا كده كده خلاص بقيت

نجم، وألف مين يتمناني أشتغل معاه، أنا بس قولت أعمل بأصلي معاك، سلامو عليكو.

ثم خرج (عطط) من المكتب، وترك (عاصي) الذي صرخ وقال:

- هفكرك تاني بالعقد اللي انت ماضيه، عليا الحرام من ديني يا عاطف لو نزلت فيديو على أي حساب

أو قناة تانية، هحبسك.

(٢٨)

وقف (عطط) بأحد الشوارع - وأمامه أحد أصدقائه يصوره فيديو بكاميرا الموبايل - يخاطب جمهوره عبر الكاميرا وهو يقوم بعمل حركات جسدية غريبة:

أحلى مسا عليكو ياأخواتي،

أنا بعمل الفيديو ده، عشان أقولكو إن عطط الدولي رجع من تاني،

وأنا من موقعي هذا بندب أي حد، واللي يعرف يعمل معايا حاجة يعملها، وبقولها

تاني عطط الدولي رجع يابشر، وإستنو فيديوهاتى الأيام الجاية، أحلى

فيديوهات طرش، وعطط الدولي فى الطرش مبيهزرش، يلا كله يعمل

حركة الإكسبلور، وشير ولايك، بحبكو ياأخواتي.

(٢٩)

قام (عاصي) بمقاضاة (عاطف)، وخلال أشهر قليلة إستطاع (عاصي) أن يأخذ عليه حكم قضائي بدفع مبلغ مالي كبير - الشرط الجزائي فى عقد الاحتكار الذي كان قد مضاه معه من قبل - أو الحبس، فلم يستطع (عاطف) أن يدفع المبلغ، وتم القبض عليه.

(٣٠)

فى ميعاد الزيارة بالسجن، جلس (عاطف) بالبدلة الزرقاء أمام أبيه الذى أخذ يلوم عليه وقد دمعت عيناه، وهو يقول:

- شوفت آخرتها يا ولدي، ياما حذرتك، ياما قولتلك خليك جنب الحيط، مسمعتش كلامي.

ذرف (عاطف) دمعة من عينه، وهو يقول:

- حقك عليا يا أبا.

(٣١)

كان (سيف) يجلس مع (نرمين) فى الكافيه الذى إعتادا أن يجلسا فيه دائماً، وبينما كان (سيف) يشرح لها فكرته وتصوره عن الفيديو الجديد، لاحظ أن (نرمين) كانت شاردة الذهن وتتنظر بعيداً، فتوقف (سيف) عن الكلام، وصمت قليلاً، ثم تساءل:

- مالك يا نرمين؟ انتي مش مركزة معايا ليه؟

- لا، أنا معاك أهو عادي.

- طيب، عموماً زي م شرحتك كده، وأنا واثق ان الفيديو ده هيحقق مشاهدات أعلى من كل الفيديوهات اللي فاتت.

نظرت بسخرية وهي تسأل:

- صحيح يا سيف، إحنا عدينا ال ٣٠٠ مشترك ولا لسة؟

رد (سيف) بحماس شديد:

- لسة لحد دلوقتي ٢٧٨، لكن إن شاء الله بعد الفيديو ده هنعدي ال ٣٠٠.

إزدادت نبرة السخرية بصوتها، وهي تقول:

- ومالك متحمس أوي كده كأنهم ٣٠٠ ألف مشترك؟

تعجب (سيف)، وعقد حاجبيه، وصمت قليلاً، ثم سألها:

- في إيه يا نرمين؟

إنفعلت (نرمين)، وعلا صوتها - بطريقة لم يعهدها (سيف) منها من قبل - وهي تقول:

- فيه إني زهقت، كل اللي بنعمله ده، وأخرتها ٢٧٨ مشترك!

- م إحنا بنجتهد وبنعمل اللي علينا، في إيه تاني بإدينا نعمله؟

- ولا حاجة يا سيف، بعد إنك أنا همشي.

قالتها بعد ان زفرت زفرة كبيرة، ثم مسكت حقيبتها، وقامت، ثم خرجت من باب الكافيه بعد أن تركت

(سيف) الذي إزداد عقد حاجبيه وهو ينظر لها بضيق شديد لا يخلو من الحيرة، وبمجرد أن خرجت

(نرمين) من الكافية، أخرجت هاتفها، ثم إتصلت بلا تردد، وبعد أن رد الرقم المتصل به، ردت

(نرمين):

- ألو، أيوة يا جمال.

بعد أسابيع قليلة بإحدى قاعات الأفراح بأحد الفنادق على نيل القاهرة، كان (عاصي) يرقص على المسرح بجانب (الدويتو علاء وماهى) - اللذان أشعلا الفرحة بأغنيتهما الجديدة - وبعد الانتهاء من الأغنية، أشار (عاصي) ل (أيمن) - الذي كان يقف بعيدا - حتي يأتي ليلتقطوا جميعاً صورة مع العريس والعروس.

كان ذلك في نفس الوقت الذي كان يقف فيه (سيف) متخفياً أمام القاعة، وقد إغرورقت عيناه بالدموع - بعد أن إختلقت ملامح وجهه ما بين الحزن والغضب الشديدين - وهو ينظر نحو العريس والعروس.

العريس(جمال).

و...العروس...

(نرمين).



لم يستطع (سيف) أن ينام فى تلك الليلة، وظل مستيقظاً حتى الصباح، ثم ذهب باكراً إلى مسرح الكلية، وجلس وحيداً على خشبة المسرح، ودمعت عيناه وهو يسرح بخياله فى الذكريات. تذكر حينما كان طفلاً صغيراً، يتسلل ليلاً من الباب الخلفى للمسرح الذى كان قريباً من بيت جده فى شارع القصر العيني، بعد أن يتأكد أن جميع العاملين والممثلين قد خرجوا ولم يعد هناك أحد سوى الحارس العجوز، الذى يظل جالساً على الباب الرئيسى فى الليل، وكان (سيف) ينظر بعيون لامعة إلى الديكور والملابس، وكان يقف على خشبة المسرح، ويقوم ببعض الحركات التمثيلية وهو يشعر بسعادة غامرة، ذلك قبل أن يدخل الحارس ويوبخه ويطرده كالمعتاد، ثم يعود للمنزل، ويقف أمام المرأة، ويبدأ فى التمثيل، ثم يقترب أكثر من المرأة، ويقوم بعمل العديد من التعبيرات بوجهه، ثم تدخل عليه أمه وتوبخه -كالمعتاد أيضاً- وهي تقول:

- أنا مش قولتلك ١٠٠ مرة متبصش فى المراية كثير، يا إما هتتلبس يا إما هتتجنن، إياك أشوفك بتعمل كده تانى.

وتذكر أيضاً عندما كان طفلاً فى المدرسة داخل الفصل عندما دخلت (المعلمة) وسألت الطلاب:

- يلا بقى يا ولاد، كل واحد فيكم يقولي عايز يطلع إيه لما يكبر؟

كان كل طالب يقف فى مكانه ويرد بظابط أو مهندس أو دكتور، إلى جاء الدور على (جمال) الذى قال:

- صحفى يا ميس

- كويس جدا، يبقى انت ممكن تدخل جماعة الإذاعة المدرسية، وانت يا أيمن؟

- أنا عايز أبقي مدرس عربى وشاعر زي بابا.

- هايل، يبقى تدخل جماعة الإذاعة مع جمال، وانت يا سيف؟

رد (جمال) بسخرية وقال:

- سيف عايز يمثل يا ميس، هههههههه.

ضحك الطلاب جميعاً، ثم إقتربت (المعلمة) من (سيف) وسألت:

- انت فعلا عايز تبقى ممثل يا سيف؟

رد (سيف) في خجل:

- أيوة يا ميس.

- طيب ممكن يافنان تقوم تمثّلنا حاجة كده.

وقف (سيف) عند مقدمة الفصل وقام بأداء مشهد - بأداء طفولي بسيط - فضحك الجميع وحتى (المعلمة) التي قالت بطريقة ساخرة:

- ههههه، ياريت يا سيف تسببك من حكاية التمثيل دي، وتشوفلك حاجة تانية أحسن.

وفي وقت الراحة وقف (سيف) حزينا في فناء المدرسة وبجانبه (أيمن) الذي قال:

- خلاص بقى يا سيف، متزعلش.

إقترب منهم (جمال) وقال بسخريته كالعادة:

- انت ايه اللي عملته في الفصل ده يا سيف؟ ههههههه.

رد (أيمن) مدافعا عن (سيف):

- عيب كده يا جمال.

إزدادت سخرية (جمال)، وعلت ضحكته، وهو يقول:

- بصراحة كان شكلك يضحك أوي.

غضب (سيف) وإحمر وجهه ومسك (جمال) من قميصه وجذبه نحوه بقوة، وهو يقول بحدة:

- ملكش دعوة بيا يا جمال، انت فاهم؟

خاف (جمال) وإرتعشت أطرافه، في نفس الوقت الذي ظهرت فيه طفلة أصغر منهم جميعاً وهي تقول:

- في إيه يا جمال؟

- متقلقيش يا نرمين، مفيش حاجة.

إلتفت (سيف) نحو (الطفلة)، فإتسعت عيناه وهو ينظر لملامحها الملائكية دون أن يقصد، وشعر نحوها بشعور غريب لم يشعر به من قبل، فأنزل يده عن (جمال) وهدأت نبرة صوته وهو يسأل:

- مين دي يا جمال؟ أختك؟

ردت (الطفلة):

- أنا نرمين بنت عمه، ملكش دعوة بجمال تاني، ياما هروح أقول للميس.

وفي صباح اليوم التالي، في فناء المدرسة، وقفت (نرمين) وحدها فإقترب منها (سيف) وقال:

- صباح الخير.

نظرت نحوه في ضيق، ولم ترد، فأكمل (سيف):

- هو جمال مجاش النهاردة ليه؟

ظلت صامته، ثم أدارت نظرها عنه، فأكمل:

- طيب هو انتي ليه واقفة لوحذك كده؟ هو انتي معنديش صحاب غير جمال؟

- لا معنديش، وإبعد عني بقى لو سمحت، أكيد جمال مجاش النهاردة عشان خايف منك.

ثم جرت بعيدا، فقطف (سيف) وردة من حديقة المدرسة وذهب إليها مرة أخرى وقال:

- على فكرة جمال هو اللي ضايقتي الأول، وعموما أنا آسف، وأوعدك لما جمال يجي بكرة هعتذرله،

بس ممكن تاخدي مني الوردة دي، ونبقى صحاب.

وتذكر (سيف) أيضا أول يوم دراسي له في كلية الآداب، عندما كان يمشي مع (أيمن) وهما يحاولان أن

يتعرفا على الكلية، ويبحثان عن فريق المسرح لكي ينضموا له، وفجأة سمعا صوت يقول:

- يا سيف؟ يا أيمن؟

إلتفتا إلى مصدر الصوت، فوجداه (جمال)، فمال (أيمن) على (سيف) وقال بصوت منخفض:

- يووووه، هو جمال ده ورأنا ورأنا!

إقترب منهما (جمال)، ثم تساءل:

- إيه ده، انتو معايا بردو هنا فى آداب؟

رد (أيمن):

- آه، أنا قسم لغة عربية، وسيف قسم تاريخ.

- حلو، أنا معاك يا أيمن قسم لغة عربية بردو.

لم ينتبه (سيف) لحديثهما، فقد فرغ فآه، ولمعت عيناه، وشعر بسعادة بالغة وهو ينظر نحو لافتة كبيرة كتب عليها:

((جماعة التمثيل ترحب بالطلاب الجدد))

وتذكر (سيف) أيضا - وهو ينظر نحو خشبة المسرح - يوم تم تكريمه بجائزة أفضل ممثل فى الجامعة، وبعدها تم إختياره كقائد لفريق التمثيل بكلية الآداب.

وتذكر (سيف) أيضا حينما كان جالسا على النيل مع (نرمين) وهي تقول:

- خلاص يا سيف أنا إتقبلت فى كلية الآداب قسم إنجليزي.

ظهرت ملامح الفرح على وجه (سيف)، ثم إقترب منها، وأمسك يدها وهو يقول:

- قسم إنجليزي، قسم فرنساوي، مش مهم، المهم إنك هتبقى معايا فى الكلية.

- بس ياترى بقى قائد فريق التمثيل فى الكلية هيقبلني ولا لا؟

إبتسم (سيف) وهو يقول:

- يافندم قائد الفريق، والفريق كله هيتشرف بانضمام معاليكي.

تذكر (سيف) أيضا عندما كان يجلس في مسرح الكلية مع (أيمن ونرمين) وقد وقف المتقدمين الجدد للانضمام لفريق التمثيل، فقام أحد المتقدمين بأداء مشهد تمثيلي تراجيدي ولكن بأداء مبالغ فيه، فضحك عليه الجميع ماعدا (سيف) الذي أمسك ضحكاته - حتى لا يجرج الشاب المتقدم للاختبار - وأخبره أن يتدرب جيدا، ثم يعود مرة أخرى للاختبار الأسبوع التالي، بعدها دخل متقدم آخر، ولكنه كان يحمل في يده جيتار، ووقف أمامهم، ثم وجه حديثه نحو (سيف) وقال:

- صباح الخير، أنا أسمي علاء، هو أنا مش بعرف أمثل، بس أنا بغني وصوتي حلو ياريت حضرتك تسمعي.

تعجب (سيف) وقال:

- بس أحنا هنا فريق التمثيل، ممكن تروح لفريق الموسيقى.

- منا روحت هناك، بس بصراحة ملقتش نفسي.

- مش فاهم قصدك، انت مش بتقول أنك بتغني؟

- أيوة، بس للأسف في كام واحد كده مسيطرين على فريق الموسيقى كله، ومن الآخر كده مش عايزين يدخلو معاهم في الفريق حد جديد غير البنات وبس، وأنا عرفت أنك شاب محترم وفنان وبتقدر الموهوبين، وعايز أبقى معاك.

- ماشي يا عم علاء، ثبتني انت بالكلمتين دول، هههههه، طيب ممكن تسمعنا حاجة.

إحترم (سيف) صراحة الشاب، كما أعجب بصوته ووافق على إنضمامه للفريق، بعدها دخل (جمال) كأحد المتقدمين للاختبار، فتعجب (سيف) الذي تساءل:

- خير يا جمال، في حاجة؟

- أنا عايز أبقى معاكو في الفريق.

إبتسم (سيف)، وإزداد تعجبه وهو يسأله مرة أخرى:

- من إمتى يعني؟ م انت طول عمرك بتتريق على التمثيل وبتقول أنه كلام فارغ، وبعدين م انت معانا من سنة أولى، إشمعنى دلوقتي عايز تنضم للفريق؟

- معلى هو أنا حسيت أنى عندي الموهبة، وعايز أبقى معاكو.

كان (جمال) لا يهتم بالتمثيل مطلقاً، لكنه أراد الإنضمام للفريق، حتى لا يترك (نرمين) وحدها مع (سيف)، وعلى الرغم من أن (سيف) كان يعلم ذلك جيداً، إلا أنه أعطاه فرصته وحقه في الإختبار، وقال:

- طيب، إتفضل ورينا مشهد.

- لا أنا مش بعرف أمثل.

ضحك الجميع، ولم يتسطع (سيف) أن يمسك ضحكاته هذه المرة وهو يقول:

- يا ابني أو مال عايز تبقى معانا في الفريق ليه؟

- هو كده، أنا عايز أبقى معاكو، وأبقو أدوني دور صغير كده وخلص، وبعدين أنا ممكن أساعد أيمن في الكتابة مثلاً.

مالت (نرمين) على (سيف) وقالت بصوت منخفض:

- خلاص يا سيف، إقبله عشان خاطري.

فضحك (سيف) وهو يقول:

- ماشي يا عم جمال، مقبول.

وفي اليوم التالي في المسرح كان أول يوم يجتمع فيه الفريق مع الأعضاء الجدد الذين تم قبولهم، وفي

أثناء الإجتماع دخل (علاء) متأخراً، وكان يلهث بأنفاسه من أثر الجري، ثم قال ل(سيف):

- أنا آسف جداً ع التأخير يا بروف.

- ده أول يوم يا علاء، ينفع يعني؟

- معلى، وأوعدك مش هنتكرر تاني.

- ماشي إتفضل.

- بس بعد إذنك أنا معايا بنت كانت عايزة تنضم معانا للفريق.

ثم أشار بيده، فدخلت الفتاة، فقدمها (علاء) وقال:

- ماهيتاب، أولى خدمة إجتماعية.

قاطعه (سيف):

- أيوة، بس إحنا هنا فريق كلية آداب.

- معش يا بروف، عشان خاطري.

- طيب، إتفضلي يا ماهيتاب قدملنا مشهد.

صعدت (ماهيتاب) فوق خشبة المسرح، وخلعت حذائها، ثم خلعت طرحتها ولفتها على وسطها ، ثم أخرجت هاتفها المحمول، وقامت بتشغيل أغنية شعبية، وبدأت ترقص وكأنها راقصة محترفة في إحدى الملاهي الليلية، كما حاولت أن تضيف على ملامح وجهها نوعاً من أنواع الإغراء، وما هي إلا ثوان قليلة وإنفعل (سيف)، وعلا صراخه في المسرح وهو يقول:

- إيه ده، إيه ده؟ إتفضلي إطفي الزفت اللي شغال ده. إحنا هنا فريق التمثيل مش فرقة رقص، وحتى لو فرقة رقص، ممكن نقبل باليه أو فنون شعبية، لكن مش كده، إحنا في جامعة ياماما مش في كباريه.

إرتعشت (ماهيتاب) ومسكت التليفون لتطفئ الأغنية، ثم مال (علاء) على (سيف) وقال:

- معش يا بروف، مكنتش تقصد.

رد عليه (سيف) وهو مازال منفعلًا:

- إيه ده يا علاء؟ انت بتهزر؟

- معش خلاص يا بروف، هي مش هتعمل كده تاني، إقبلها بس معانا وهي هتنفذ كل اللي هتقول عليه، وعموما أنا هخليها تسبب الرقص خالص، وهدربها وأعلمها التمثيل.

- يا ابني هو انت أصلاً بتعرف تمثّل؟

فرد (علاء) وهو يمزح محاولاً أن يهدئ (سيف):

- لا.

بالفعل هداً (سيف) من تلك المزحة، وإبتسم إبتسامة خفيفة وهو يقول:

- انت كده فعلا بتهزر.

ضحك (علاء) وإقترب من (سيف) وقال:

- والنبي يا بروف إقبلها معانا، وانت بقى البركة فيك تبقى تعلمنا، ده انت البروف الكبير.

بعد إلحاح شديد من (علاء) وافق (سيف) على إنضمام (ماهيتاب)، بعد أن أكد عليها أن لا تقوم بالرقص

مرةً أخرى، وأنه قد يحتاجها في أداء بعض الإستعراضات البسيطة، ولكن دون إغراء.

ثم تذكر (سيف) أيضا كلمات (نرمين) له في الكافيه:

- ومالك فرحان أوي كده كأنهم ٣٠٠ ألف مشترك؟

وتذكر (سيف) أيضا كيف كان يلف على مكاتب الكاستنج والمخرجين وشركات الانتاج طوال السنوات

الماضية، ولكن دون جدوى.

وتذكر (سيف) أيضا عندما كان جالسا في غرفته، ثم دخلت عليه (أمه) وقالت بإنفعال:

- وبعدين معاك يا سيف، دي تامن سنة ليك في الكلية، مش ناوي تتخرج بقى وتسبيك من التمثيل

والكلام الفارغ ده؟

وتذكر (سيف) أيضا عندما إستدعاه (عميد الكلية) إلى مكتبه، وقد علا صوته وهو يوبخه، بينما كان

(سيف) واقفا يسمع تلك الكلمات التي نزلت على أذنيه كالصاعقة:

- في إيه يا سيف؟ انت كنت أول دفعتك ٣ سنين، جراك إيه؟ أنا عارف إنك بتسقط نفسك آخر كام

سنة، ومش عايز تتخرج من الجامعة مخصوص عشان تفضل في فريق التمثيل، بس أنا يا ابني

ونظر نحو كراسي الصالة الفارغة ...

وتخيل أنها ممتلئة بالجماهير، فأخذ نفسا عميقا، ومسح دموعه، وإستجمع قواه، وصرخ بقوة وهو يقول:

- أن هعرفكم مين هو سيف، وهعرفكم إني لو مشيت فى طريقكم هبقى أحسن منكم ألف مرة.

ثم أمسك بقطعة معدنية من الديكور وجلس على أرضية خشبة المسرح ونحت جملة:

((ويل للعالم إذا إنحرف المثقفون)).



- فى مكتب (عاصى) جلس كلا من (عاصى وأيمن وعلاء وماهى ونرمين وجمال) وكانوا يحتفلون بمناسبة توقيع (نرمين) للعقد مع (عاصى)، وعندما أعطى (عاصى) ل (نرمين) العقد كى توقعه، ترددت قليلاً، ثم استأذنت لى تخرج لدقائق مع (جمال) لتتساور معه بشأن العقد.
- وفى بلقونة الشركة وقفت (نرمين) أمام (جمال) فى حيرة من أمرها وهى تقول:
- أنا خائفة يا جمال، إية رأيك فى حكاية العقد دى؟
- خائفة من إيه بس يا حبيبتي؟ الراجل صدق فى كل وعوده معاكى، وجابلك شغل أكثر من مرة، وحطك على طريق النجومية، ولسة كمان الراجل محضرك شوية عروض حلوة جدا.
- أيوة يا جمال، بس ده عقد احتكار عشر سنين، عارف يعنى إيه عشر سنين!
- وفيها إيه؟ الراجل عايز يضمن حقه، وده حقه فعلا، وزى مكسبنا من وراه، هو كمان لازم يكسب من ورائنا، وكمان لازم تبقي فاهمة إن العقد ده زى م بيضمن له حقه، بيضمن لك حقا انتى كمان.
- بس الشرط الجزائى كبير أوى، أنا كده عمري م هقدر أسويه أبدا.
- وإحنا نسيبه ليه بس يا حبيبتي؟ الراجل عامل معانا أحلى واجب، وبعدين طب م أيمن وعلاء وماهى ماضيين معاه نفس العقد، وأهم شغالين وزى الفل.
- متساش ان عاصى سجن عاطف بسبب عقد زى ده.
- وانت هتجيبى نفسك لعاطف يا حبيبتي، عاطف ده صايع جه هنا وقل أدبه على عاصى أكثر من مرة، وبعدين أنا وريت العقد لمحامي صاحبي وقالى إنه تمام.
- والله يا جمال المشكلة مش فى العقد، المشكلة فى عاصى نفسه، انت مش واخذ بالك ببصلي إزاي؟
- معذور يا حبيبتي، واحدة زى القمر زيك لازم تخطف العين، بس صدقيني هو راجل محترم، وبعدين متقلقيش أوى كده، أومال أنا روحت فىن، منا طول الوقت هفضل جنبك، يلا بقى يا حبيبتي عشان متناخرش ع الراجل.

ثم دخل نحو المكتب، فترددت (نرمين) قليلاً ثم دخلت خلفه.

بعدها، شعر (عاصي) بالسعادة، وإلتمعت عيناه وهو ينظر ل(نرمين) بعد أن مضت على العقد، ثم

أشعل سيجارة حشيش وهو يغمز بعينه ويقول:

- مبروك يا نجمة.

و ...

فجأة ...

دخل (سيف) عليهم المكتب وهو يقول:

- مساء الفل عليكو، وحشتوني أوي.

إندهش الجميع وخاصة (عاصي) الذي تغيرت ملامح وجهه فجأة وهو يقول:

- سيف؟ خير، إيه اللي رماك علينا بعد الغيبة دي كلها؟

- شغل، عايزك في شغل.

ضحك (عاصي) ضحكة كبيرة وهو ينفث دخان الحشيش، ويقول بإستهزاء:

- م انت عارف يا حبيبي، أنا مليش في شكسبير.

إقترب (سيف) من (عاصي) ثم أخذ سيجارة الحشيش من يده، وأخذ منها نفساً عميقاً، ثم نفث دخاناً

كثيفاً في وسط دهشة الجميع وهو يقول:

- لا يا عم عاصي، شكسبير ده كان زمان، أنا جايلك بفكرة مش بس هتركبنا التريند، ده إحنا هفضل

راكبينه ومش هننزل منه تاني.

لم يرد (عاصي)، فصمت (سيف) قليلاً، ثم أكمل:

- ياسيدي إسمع الكلمتين، لو عجبوك تمام، ولو مدخلوش دماغك مش هتخسر حاجة، أنا هغور في

دأهية وهختفي ومش هتشوف وشي تاني.

ثم إلتفت ينظر نحو الجميع، وهو يكمل:

- بس.. بعد إذئك، محتاجين نتكلم على إفراد.

تعجب الجميع من الثقة التي تحدث بها (سيف) الذي لم يكن معروفاً عنه شربه للحشيش مطلقاً، ولكن تلك الطريقة أثارت فضول (عاصي) الذي أخبرهم أن ينتظروا جميعاً في الخارج، وظل وحده مع (سيف) في المكتب.

(٣٥)

فى ريسبشن الشركة، كانت (نرمين) قد بدا عليها التوتر وهى تقول:

- أنا مش فاهمة هما بيعملوا إيه جوه كل ده؟

رد (جمال) بعصبية:

- وانتى مالك متعصبة أوي ليه كده؟

- لا مش متعصبة ولا حاجة.

وفى نفس الوقت فى داخل المكتب كان (عاصي) قد أشعل سيجارة حشيش أخرى، وقد إمتزجت على

وجهه ملامح الفرح والدهشة فى نفس الوقت، وهو يقول ل(سيف):

- يا ابن اللعيبه، كانت فىن الدماغ الجامدة دي من زمان.

رد (سيف) وهو ينفث دخان الحشيش:

- كنت حمار يا صاحبي، أو تقدر تقول إنى كنت مجنون وخلص عقلت.

- بس أنا مش واثق فىك يا سيف، وبصراحة كده أنا مقلق ليكون ده ملعوب انت عامله عليا.

- يا عم بقولك كنت حمار وعقلت خلاص، وعموماً يا عم عاصي أنا مستعد لأي ضمانات تطلبها منى.

- تعجبني يا سيف، هو دة الكلام.

ثم أخرج (عاصي) عقدا من درج مكتبه ووضع أمام (سيف) وهو يقول:

- إمضى.

وفى ريسبشن الشركة، وبعد حوالي أكثر من ساعة، بعد أن كاد الفضول أن يقتلهم جميعاً، وخاصة

(نرمين) التى إقتربت من (أيمن) وهى تقول:

- م تقوم يا أيمن تشوفهم بيعملوا إيه جوا كل ده.

وفى نفس اللحظة فتح (عاصي) باب المكتب وبجانبه (سيف) وهو يقول:

- باركوا لسيف يا جماعة، مضيئا العقد مع بعض.

تركت تلك الجملة آثاراً مختلفة على وجوههم جميعاً، فقد إرتسمت ملامح الفرح على وجه (علاء وماهي) وباركال(سيف)، وإرتسمت ملامح الدهشة على وجه (نرمين) التي ظلت تنظر ل(سيف) دون أن تنطق بكلمة، وإختلطت ملامح وجه (جمال) مابين الفرح والقلق، فقد فرح لأن (سيف) بذلك قد تنازل عن مبادئه وأصبح مثلهم، ولم يعد أفضل منهم في شيء، لكنه في نفس الوقت شعر بالقلق من أن (سيف) سيعود إلى الشركة مرةً أخرى، وبذلك قد تفكر (نرمين) فيه مرةً أخرى، وأما (أيمن) فقد إرتسمت على وجهه خيبة الأمل، ولم يصدق ما فعله (سيف)، فقد كان دائماً يعلم أن (سيف) على صواب، وكان في أعماق نفسه يكن له كامل الإحترام والتقدير، ولكنه صدم بما حدث، فأخذ ينظر ل(سيف) الذي أشعل سيجارته، وخرج إلى البلكونة، فإقترب منه (أيمن) وهو يقول:

- إيه اللي انت عملته ده يا سيف؟

نظر له (سيف) بلا مبالاة، ثم قال:

- مش فاهم قصدك إيه؟

- لا انت فاهم قصدي كويس، ليه عملت كده؟

- هو في إيه يا أيمن؟ مش ده كان كلامك؟ وأديني سمعت الكلام، ولا هو يعني حلو ليكو، ووحش ليا؟

- مش قصدي، بس يعني مش لدرجة إنك تمضي معاه عقد؟ وبعدين انت من إمتى بتشرب حشيش يا

سيف؟

- لا بقولك إيه أيمن، فكك مني، عشان اللي فات كان سيف، واللي جاي سيف تاني خالص.

(٣٦)

بعد أسابيع قليلة تربع (سيف) على عرش الترند منذ يومه الأول بعد إصدار فيديو له وهو يرتدي ملابس أنطونيوس، ويغني مهرجان عن انطونيوس وكليوباترا، ولكن تلك المرة مع (ماهي) التي كانت ترقص بخلاعة وهي ترتدي ملابس كليوباترا، وبعدها يقدم حلقة يتحدث فيها عن التاريخ البطلمي بمنتهى الأسف والرخص، وقد تزايدت أعداد المشاهدات بطريقة جنونية.

(٣٧)

كانت (رانيا) - بعد أن تركت شركة عاصي - قد وافقت على عرض (مروان) صديقها، وأصبحت تعمل معه في الشركة، وبينما هي جالسة على مكتبها، دخل عليها (مروان) وهو يشغل على هاتفه فيديو (سيف وماهي)، وهو يقول:

- شوفتي الوساخة وصلت لحد فين؟ انتاج عاصي بروكشن ياستي.

أخذت (رانيا) الهاتف، ولم تصدق نفسها وهي تشاهد الفيديو وقالت لنفسها بحسرة:

- خسارة يا سيف.

أقام (عاصي) حفلاً كبيراً في حديقة الفيلا الخاصة به، وقد حضر الجميع، وكانوا يستمتعون بسماعهم الموسيقى، إلى أن اشار (عاصي) بيده فتوقفت الموسيقى، ثم أمسك مكبر الصوت بيده وقال:

- الحفلة النهاردة على شرف سيف، أعلى تريند في تاريخ الشركة.

ثم إلتقط (عاصي وسيف) صورة تذكارية معا وهما يرفعان كأسى الخمر بيديهما، ثم أشار (عاصي) بيده، فعاد صوت الموسيقى مرةً أخرى، بعدها، بدأ كلا من (علاء وماهى) في أداء أغنيتهم الشهيرة، وكانت (ماهى) تتمايل على (سيف) أثناء قيامها بالإستعراض الخاص بها، مما أشعل الغيرة في قلب (نرمين) التي كانت تنظر لهما وهي تقف بجانب (جمال)، ولكنها لم تطيق النظر كثيراً، فتظاهرت بأنها تريد الذهاب إلى الحمام، وبالفعل دخلت الحمام بداخل الفيلا، ثم ظلت تنظر لوجهها في المرأة، وهي تحدث نفسها وتقول:

- مالك يا نرمين؟ غيرتي أوي ليه كده؟ انتي لسة بتحبي سيف؟ ولما انتي لسه بتحبيه أوي كده، أومال ليه سبتيه وروحتي لجمال؟

ذرفت دمعة من عيناها، ثم حاولت أن تطرد تلك الأفكار من رأسها، وهي تخرج من حقيبتها علبة المكياج الخاصة بها، لتعيد ضبط وجهها مرةً أخرى، ثم خرجت من الحمام، فوجدت (عاصي) الذي كان واقفاً، ويبدو أنه كان ينتظرها، إقترب منها وقد ثقل لسانه قليلاً - وبدأت تظهر عليه آثار الشرب - وهو يقول لها:

- انتي حلوة أوي النهاردة يا نرمين.

إرتعشت (نرمين) وشعرت بخوف شديد، ثم جرت مسرعة نحو الخارج، وإتجهت نحو (جمال) الذي كان يرقص، فجذبتة من يده، وقد بدا عليها التوتر الشديد وهي تقول:

- يلا يا جمال عشان توصلني، أنا عايزة أمشي.

- تمشي ليه؟ ده الحفلة لسه في أولها.

- بقولك عايزة أمشي دلوقتي حالاً.
- حصل إيه بس يا حبيبتي؟
- عاصي كان واقفلي عند الحمام، وحاول يضايقني.
- يا حبيبتي لازم تاخدي الأمور ببساطة أكثر من كده، وتشيلي عاصي من دماغك، أنا واثق أنه مكنش يقصد، وقولتك قبل كده أن عاصي ده راجل محترم.
- تعجبت (نرمين) من اللامبالاة التي تحدث بها (جمال)، فقالت:
- أنا إبتديت أقرف منك يا جمال
- يا حبيبتي متكبريش الموضوع بقى، ويلا عشان محدش يلاحظ حاجة.
- قالها ثم ذهب ليكمل رقصه، وظلت (نرمين) واقفة وحدها، وقد شعرت بحزن وأسى شديدين.
- في نهاية الحفل، وبعد أن هدأت الموسيقى، كان (سيف) واقفاً وحده بركن هادئ في الحديقة وقد أشعل سيجارة بيد، وكان ممسكاً بكأس الخمر باليد الأخرى، ثم إلتفت وراءه بعد أن سمع صوتاً هادئاً يقول:
- وحشتني يا سيف.
- وجدتها (نرمين) فرد عليها بلامبالاة:
- أهلا يا نرمين، مبروك على الخطوبة، ولو أنها متأخرة شوية معلى.
- ثم أدار ظهره لها مرةً أخرى، فإقتربت منه (نرمين) وقالت للمرة الثانية:
- وحشتني يا سيف.
- وانتو كمان كلكو كنتوا وحشني أوي.
- قالها (سيف) وهو مازال يعطيها ظهره، فأدركت (نرمين) أنه يصدها، فحاولت أن تغير الحديث وهي تقول:
- أنا بصراحة مش قادرة أصدق، التغيير اللي انت فيه ده حصلك إمتى؟ وإزاي؟

- إيه يا نرمين، هو مش ده كان كلامك؟ ومش كلامك انتي بس، ده كلام أيمن وكلامكم كلكم، فكك مني

يا نرمين، وسبيني أعيش حياتي، وأعوض اللي فاتني.

ثم تركها ومشى وهو يقول:

- بعد إذنك عشان عاصي بينده عليا.

كان (الكولونيل سيف) ضابطاً فرنسياً جاء إلى مصر أثناء الحملة الفرنسية، وبعد رحيل الفرنسيين بسنوات قليلة، وصل (محمد على) للحكم في مصر، وإعتمد على (الكولونيل سيف) في تأسيس جيش حديث، وقد إعتنق الإسلام وولقب بسليمان باشا الفرنساوي. وقد أطلق (سيف) على نفسه إسم (الكولونيل سيف) لكي يتقرب من الطلاب، حيث ورد ذكر إسم (الكولونيل سيف) بمنهج التاريخ في مادة الدراسات الإجتماعية بالصف الثالث الإعدادي.

وقد تم رفع فيديو ع اليوتيوب بعنوان:

((الكولونيل سيف وماهي في مهرجان درس التضاريس جغرافيا تالته إعدادي))

كان الفيديو عبارة عن أغنية مهرجان لأسماء الجبال والهضاب والأودية التي وردت بمنهج الجغرافيا للصف الثالث الإعدادي، وكانت (ماهي) تتلوى أمام (سيف) الذي كان يشير على أجزاء من جسدها، وهو يغني:

((آدي الهضاب، وآدي الجبال، من نظرة منها، أنا قلبي مال))

وقد حصد الفيديو ملايين المشاهدات وتربع على عرش الترند منذ يومه الأول.

(٤١)

على باب أحد النوادي، تظهر لافتة كبيرة مكتوب عليها:

((مراجعة ليلة الإمتحان مع أسطورة الدراسات الإجتماعية الأستاذ نبيل الإمبراطور بحضور الكولونيل

سيف وماهي))

على اللافتة ظهرت صورة كبيرة ل(نبيل الإمبراطور وسيف وماهي)، وبداخل النادي تجمع آلاف الطلاب الذين أخذوا يرقصون أمام خشبة المسرح التي وقف عليها (سيف وماهي) يغنيان مهرجان التضاريس، وكان هناك شاشة كبيرة بجانب المسرح، ظهرت عليها خريطة لتضاريس قارات العالم، وكان نبيل الإمبراطور يشير إلى الخريطة نحو كل جبل أو هضبة أو وادي تم ذكره في الأغنية.

بعد الانتهاء كان (سيف وماهي) يجلسان في سيارة فاخرة أمام الباب الخلفي للنادي، ثم خرج من النادي (نبيل الإمبراطور) وحوله عدد من رجال الحراسة - وكأنه أحد كبار رجال الدولة - وتوجه نحوهما، وأعطى (سيف) شنطة بها رزم من الأموال وهو يقول:

- تمام كده يا كولونيل؟

- تمام يا معالي الإمبراطور.

- معاك أسبوعين يا كولونيل تكون أنجزتني في مهرجان الثانوية العامة، آمين؟

- آمين.

كانت (رانيا) جالسة على مكتبها، وكانت تمسك هاتفها، وتتنظر إلى رقم (سيف) وهي مترددة في الإتصال به، وبعد عدة دقائق من التردد، تشجعت وإتصلت، رد (سيف) فأخبرته أنها تريد مقابلته، وبالفعل تقابلا في أحد الكافيهات على كورنيش النيل، وقالت (رانيا):

- إزيك يا سيف؟ كده بردو متسألش عني طول الفترة دي من ساعة م سبت الشركة؟

- معلش يا رانيا، أنا مریت بفترة صعبة شوية، وبعدها إنشغلت جدا.

وبينما كأنا يتحدثان ظهر عدد من المرآهقين الذين قال أحدهم، وهو يشير نحو (سيف):

- سيف الكولونيل أهو يا عيال.

جروا جميعاً نحو (سيف) وأخذوا يلتقطون الصور معه، ثم غنى لهم مقطع صغير من المهرجان،

بينما كانت (رانيا) تنتظر له بتعجب ودهشة شديدين.

ثم مشى الأولاد، وظلت (رانيا) تنظر ل(سيف) دون أن تتحدث بكلمة، فتعجب (سيف) الذي سأل:

- في أيه يا رانيا؟ مالك بتبصيلي كده ليه؟

- مش قادرة أصدق إن اللي قدامي ده بيقى سيف.

أدار (سيف) نظره عنها، ونظر نحو النيل، ثم اخذ نفسا عميقا، ثم قال:

- انتي عايزة إيه بالظبط يا رانيا؟

- عايزاك ترجع سيف بتاع زمان، الفنان الحقيقي اللي بجد، أنا كنت مؤمنة بيك جدا يا سيف

ضحك (سيف) بسخرية وهو يقول:

- مؤمنة بيا؟ آآه، عشان كده أول م جتلك الفرصة إنك تسيبي الشركة سبتيها ومشيتي من غير م

تفكري تاخديني معاكي وتتنشليني من وسط الكلاب دول.

- أنا كنت عايزة أكلمك بس أنا كنت عارفة اللي بينك وبين نرمين.

إنفعل (سيف) وهو يقول:

- متجيش سيرة الزفتة اللي إسمها نرمين دي تاني.

ثم عقد حاجباه، وتساءل:

- وبعدين إيه علاقة إنك تاخديني وتعرضيني على الشركة اللي إشتغلتي فيها، باللي كان بيني وبين

نرمين؟

- علاقته إني...، إني بحبك.

أهتز (سيف) في داخله بعد سماع تلك الكلمة، ولم ينطق بحرف واحد، وفرغ فآه وهو ينظر ل(رانيا)

التي صمتت قليلاً ثم أكملت:

- ومكونتش أقدر أقولك حاجة زي دي، لأنني كنت عارفة اللي كان بينك وبين نرمين.

هدأت ملامح وجه (سيف)، ولكنه ظل ينظر لها في صمت، فأكملت (رانيا):

- عشان خاطري يا سيف، خلاص سيبك من السكة دي، وأنا هجيبك عروض محترمة بجد، تليق بيك

وبموهبتك، وإن شاء الله هتحقق كل اللي نفسك فيه.

أدار (سيف) نظره مرة أخرى نحو النيل، وأخذ يفكر قليلاً وهو مازال صامتاً، ثم تنهد وقال:

- ماشي يارنيا، بس مش دلوقتي، أنا بخطط لحاجة كده وأول م تحصل هسيب كل القرف اللي أنا فيه

ده.

- بتخطط لإيه يا سيف؟

- هقولك.

(٤٣)

انتهت (شوشو) للثو من اللايف المباشر الذي كانت تبثه من بيتها كعادتها، حيث كانت تتحدث مع جمهورها وترد على تساؤلاته بخصوص الأبراج والعلاقات العاطفية، بعدها رن جرس الباب، ففتحت ووجدت (سيف) الذي نظر لها قليلاً ثم قال مبتسماً:

- إزيك يا شوقية؟ ولا تحبي أقولك يا شوشو؟

تعجبت (شوشو)، وبدا عليها الإرتباك، وهي تقول:

- أستاذ سيف، أهلا وسهلا إتفضل.

دخل (سيف)، وبعد أن قدمت له (شوشو) مشروباً ساخناً، جلست بجانبه، ثم قالت:

- أهلا وسهلا، خطوة عزيزة والله يا أستاذ سيف.

- معلش يا شوقية، أنا آسف إني جيتلك كده من غير معاد.

- متقولش كده يا أستاذ سيف، ده بيتتك، تنور في أي وقت.

- ربنا يخليكي، أنا متابك على فكرة، ماشاء الله بقى ليكي جمهور كبير.

- الحمد لله، أنا كمان متابك على فكرة، بس ...

ترددت (شوشو) قليلاً قبل أن تكمل كلامها، فقاطعها (سيف) وقال:

- بس إيه؟

- بصراحة مش قادرة أصدق أنك تعمل الحاجات دي، انت تستأهل أحسن من كده بكتير.

فتحت تلك الجملة التي قالتها (شوشو) باباً للنقاش حول ما يتم تقديمه على وسائل التواصل الإجتماعي، وتعجب (سيف) من (شوشو) وآرائها، حيث وجدها على درجة عالية من الوعي والثقافة، بعد أن كان يتخيلها مجرد فتاة تافهة، تقدم محتوى تافه، وأخبرته أنها تعلم جيداً أن المحتوى الذي تقدمه لا قيمة له، لكنها أخبرته أيضاً أنها لم تجد وسيلة أخرى للكسب الحلال تستطيع من خلالها أن تجني المال، حتى تتمكن من العيش وسط ظروف الحياة القاسية، وفي نهاية الحديث قال (سيف):

- شوقية، أنا كنت محتاج منك خدمة.

(٤٤)

فى مكتب مأمور السجن، جلست (شوشو) مع أخيها (عاطف) الذى كان فى حالة يرثى لها، وبعد

حديث قصير بينهما، قالت له:

- فى حد عايز يشوفك يا عاطف.

- مين؟

فتحت (شوشو) باب المكتب، فدخل شخص وقال:

- أنا يا عاطف.

ظهرت ملامح الدهشة على وجه (عاطف) الذى فرغ فآه، ورفع حاجباه فى ذهول، وهو لا يصدق ما

يرآه، ثم قال:

- مين؟ أستاذ سيف؟!!!!



(٤٥)

كانت (ماهي) على السرير في منزلها، عندما إستيقظت من النوم على رنين هاتفها، فنظرت إلى الشاشة فوجدته (أيمن)، فردت عليه وقالت:

- ألو. صباح الخير يا أيمن.

- خير إيه، انتي لسة نائمة؟ انتي لسة معرفتيش ولا إيه.

- معرفتش إيه؟

- إفتحي النت حالاً وانتي هتعرفي، وأنا هكلم المحامي عشان يشوفك حل في المصيبة دي.

- محامي إيه، ومصيبة إيه؟ أنا مش فاهمة حاجة، في إيه يا أيمن؟

- إفتحي النت بس، سلام.

وبمجرد أن فتحت (ماهي) النت، إنهال عليها سيل من الرسائل التي تحتوي على رابط لفيديو إباحي تم تصويره لها مع رجل يبدو عليه أنه خليجي الجنسية، لم تكن ملامح وجه الرجل ظاهرة بوضوح، ولكن ملامح (ماهي) كانت واضحة كالشمس، وقد رفع هذا الفيديو بعنوان:

((شاهد قبل الحذف فضيحة الراقصة ماهي))

وقد تزايدت أعداد المشاهدات على الرغم من أن الفيديو لم يمر على رفعه سوى عدة ساعات فقط، وبينما كانت (ماهي) مذعورة من أثر تلك الصدمة، سمعت طرق شديد على باب الشقة، فهبت من السرير، ثم فتحت باب الشقة، فوجدت ٣ أشخاص، قال أحدهم بطريقة حادة:

- انتي ماهيتاب السيد عبد السلام الشهيرة ب ماهي؟

- أيوة.

- معانا إذن من النيابة بالقبض عليك، خدوها.

(٤٦)

- فى مكتب الضابط بقسم الشرطة، جلس (علاء وأيمن) أمام (ماهى) التى إنخرطت فى البكاء، وقد بدا (علاء) مصدوما وهو يقول:
- انتى إزاي تعملى كده؟
- ده كان جوزى، والله العظيم كان جوزى.
- جوزك؟ انتى كمان كنتى متجورزة يا ماهيتاب؟
- قاطععه (أيمن) وقال:
- مش وقته الكلام ده يا علاء، لما نشوف الأول هنخلص من المصيبة دي إزاي.
- لا طبعا، ده هو ده وقته، الهاتم طلعت بتخونى، لأ وكمان متجوزة.
- ثم جذب (علاء) (ماهى) من شعرها، وهو يقول:
- سيف كان طول عمره بيحذرني منك، بس أنا كنت بكده وبصدق قلبى، قلبى اللي حبك ياوسخة.
- تدخل (أيمن) ليخلصها من يده وهو يقول:
- انت إتجننت يا علاء، انت نسيت إننا فى القسم، قولتلك مش وقته خالص الكلام ده، إتفضل إستناني
- بره.
- أخرج (أيمن) (علاء)، ثم عاد ل (ماهى) مرة أخرى، وقال لها:
- دلوقتي يا ماهيتاب انتى بتقولى إن الراجل ده جوزك، طيب هو فين؟ ومظهرش ليه لحد دلوقتي؟
- كان جوزى، وخلص رجع بلده.
- طيب فين قسيمة الجواز؟
- ده كان جواز عرفى. وبعدين أنا والله مكونتش أعرف إننا بنتصور.
- ياستى طب فين ورقة الجواز العرفى دي؟

- الورقة مع عاصي، وهو اللي عارف كل حاجة، وأكد هو اللي صورنا، وهو اللي رفع الفيديو ده، أرجوك يا أيمن لازم تروح تاخذ منه الورقة وتجهالي هنا، قبل م أتعرض ع النيابة بكرة الصبح، أنا مليش غيرك دلوقتي يا أيمن، أرجوك.

(٤٧)

فى مكتب (عاصي)، جلس (أيمن) أمام (عاصي)، وكان ينظرله بغضب شديد، وهو يقول:

- انت إزاي تعمل كده يا عاصي؟

ضحك (عاصي) وهو يقول:

- بس إيه رأيك، تريند ابن جنيه، ومشاهدات بالعبيط.

إنفعل (أيمن) وهو يقول:

- أنا طول الوقت كنت عارف إنك وسخ، بس مكوناتش أعرف إنك بالوساخة دي.

- متعليش صوتك يا حبيبي، البننس مافيهوش وسخ ونضيف، وبعدين كل حاجة كانت بمزاجها وبرضآها.

- طيب يا عاصي، انت مش خلاص عملت اللي انت عايزة وركبت التريند، لو سمحت بقى هات الورقة.

- ورقة؟ ورقة إيه؟

- ورقة الجواز العرفي، اللي هتبرأ ماهيتاب.

- بالسهولة دي، ههههه، بص يا أيمن أنا مستعد أديك الورقة بس بشرط.

- شرط؟ شرط إيه؟

- ٥ مليون جنيه.

- إيه؟

- زي م سمعت كده، ٥ مليون جنيه.

- انت بتهزر ولا بتتكلم بجد؟ وهي ماهيتاب هتجيبك المبلغ ده كله منين؟

- م هي أفشة فلوس قد كده من الراجل الخليجي اللي كان معاها في الفيديو، وبعدين إتصرف انت بقى،

هي تدفع شوية، انت تدفعها شوية، علاء حبيب القلب يدفعها شوية، مليش فيه.

- انت مش بس وسخ يا عاصي، د انت أوسخ واحد أنا شوفته في حياتي.
- وهو انتو يعني اللي نضاف أوي؟ بص بقى ياروح أمك، انتو شوية عيال ملكوش لازمة، وأنا اللي عملتكو، وكل العز اللي انتو فيه ده من خيرى، إطلع بره ياض، ومشوفش وش أمك تاني غير وانت معاك الفلوس.

فى صباح اليوم التالى، أمام مبنى النيابة، نزلت (ماهى) من عربة الترحيلات، وحولها عدد كبير من الصحفيين والمصورين الذين حاولوا أن يجروا معها حديث ولو لثواني معدودة، ولكنها لم تتحدث بكلمة واحدة مع أحد، وحاولت أن تخفى وجهها عن عدسات الكاميرات، وظلت تبكي فى صمت إلى أن دخلت مبنى النيابة، ووجدت (أيمن)، فشعرت وكأن روحها عادت إليها مرة أخرى، ووجدت طوق النجاة، فقالت له:

- هاه يا أيمن، جبت الورقة؟

- ابن الكلب مش راضى يدينى الورقة غير لما ياخذ ٥ مليون جنيه.

- يانهار أسود، يانهارد أسود.

قالتها (ماهى) وهى تلمم على وجهها، وبعدها، نادى العسكري على إسمها لتدخل لوكيل النيابة، فنظرت نحو (أيمن) وهى تصرخ:

- متسبنيش يا أيمن، أنا مليش غيرك دلوقتى، متسبنيش يا أيمن.

(٤٩)

فى داخل مكتب (وكيل النيابة)، جلست (ماهى) وقد أنهارت من البكاء، وفى نهاية التحقيق، نظر لها (وكيل النيابة) بحدة، هو يقول:

- أمرنا نحن بحبس المتهمه ماهيتاب السيد عبد السلام ٤ أيام على ذمة التحقيق، ويراعى التجديد فى معاده.

(٥٠)

فى المساء جلس (علاء وأيمن) فى منزل (علاء) وكأنا فى حالة نفسية يرثى لها، خاصة (علاء) الذى كان يدخل الحشيش بشرأهه، ثم قال:

- أنا مش عارف إزاي ماهيتاب تعمل كده؟

لم يرد عليه (أيمن) فقد سرح بذهنه وتذكر (سيف).

تذكر حديث (سيف) معهم عندما كانوا فى ريسبشن الشركة وكان (علاء) يعرض على (أيمن) أن يكتب له كلمات أول مهرجان، عندما شعر (سيف) بالغضب والضيق، فحاول أن يهدئه (أيمن) وقال:

- اهدى يا سيف.

- اهدى إيه؟ خلاص، عمالين تتنازلو كلكم واحد ورا التانى. عاصى أشتراكم كلكو؟

- يا سيف اهدى عشان أشرحلك.

- يا عم ولا تشرحلى ولا زفت.. أنا ماشى وسايبهالكو خالص.

عاد (أيمن) من سرحانه إلى واقعه مرةً أخرى، وأخذ نفساً عميقاً من سيجارة الحشيش التى كانت فى يد (علاء) وقال:

- تفتكر يا علاء، سيف كان عنده حق؟

- سيف إيه يا عم أيمن اللي كان عنده حق، م هو لعبها زينا بالظبط، وبقي أفجر مننا كمان، وبعدين

هو فين أصلاً؟ إزاي يسبنا في ظروف زي دي؟

- بكلمه من إمبراح مش بيرد.

و ...

فجأة ...

طرق باب الشقة بشدة، وعندما فتح (علاء) الباب وجد رجال الشرطة الذين إقتحموا الشقة، ثم مسك

الضابط سيجارة الحشيش بيده، ثم إنتفت لأحد مساعديه وهو يقول:

- لملي يا ابني الأحراز دي، وهاتهوملي هما الأثنين ع البوكس.

فى اليوم التالى كان (عاصى) فى مكتبه عندما تلقى رسالة على هاتفه من رقم مجهول، وعندما فتحها، وجد فيديو للقبض على (علاء وأيمن)، فضحك ضحكة هستيرية وهو يقول لنفسه بدهاء وخبث شديدين:

- أهلا، ده انتو كده جيتو على حجرى، أحلى تريند دة ولا إيه، هههههههه

لم يتردد (عاصى) للحظة واحدة قبل أن يرفع الفيديو على صفحته، وبالفعل حصد الفيديو فى ساعته الأولى مشاهدات قياسية، وبينما كان (عاصى) يرصد تفاعل الجمهور مع الفيديو، طرق باب الشركة بشدة، ففتحت السكرتيرة، ووجدت رجال الشرطة الذين إفتحوا مكتب (عاصى)، ثم إقترب أحدهم منه، ووضع أمامه على المكتب ورقة، وهو يقول بحزم:

- ده إذن من النيابة بالقبض عليك، إتفضل معانا.

- بعد ساعات قليلة في منزل (جمال ونرمين) الذان لم يمر على زواجهما سوى عدة أسابيع، لاحظت (نرمين) أن (جمال) كان يبدو عليه التوتر وهو يغير ملابسة بسرعة، فسألته بدهشة:
- في إيه يا جمال؟ انت نازل؟
 - أيوة.
 - رايح فين؟ ومالك متسرع كده؟
 - عاصي إتقبض عليه.
 - إيه؟ عموما أحسن، ده ذنب ماهيتاب.
 - ماهيتاب إيه بس دلوقتي، عاصي لو إتحبس أنا هروح في ستين دأهية.
 - ياسلام؟ إشمعنى يعني.
 - إسكتي يا نرمين انتي مش فاهمة أي حاجة.
- ما كاد (جمال) أن ينهي جملته حتى طرق باب الشقة بشدة، ففتحت (نرمين) ووجدت رجال الشرطة، الذين قال أحدهم:
- ده منزل جمال الصفتي؟
 - أيوة يافندم، خير؟
 - معانا إذن من النيابة بالقبض عليه.

جلس (سيف) فى غرفته بمنزله وقام بفتح لايف (بث مباشر) لجمهوره، وكان يبدو عليه الأسى وهو يقول:

أنا عارف أن المهرجانات اللي أنا عملتها دي كانت غلطة كبيرة، فى حق الطلاب، وفى حق المجتمع، وفى حق نفسي.

بس انتو السبب.

انتو اللي مش بتسمحو للحاجات الكويسة إنها تظهر، انتو اللي بتشجعوا إن الوسخ هو اللي يكمل، والمحترم يفضل مكانه ولوحده لحد م يكتتب ويموت، أو يطفش ويسيب البلد.

أنا فى الأول دخلت لعبة التريند دي عشان بس كنت عايز أثبت لأصحابي أنهم غلط، وإن أي حد بأى حاجة تافهه وبكل سهولة يقدر يركب التريند ويبقى نجم فى يوم وليلة.

لكن فجأة، لقيت نفسي محتاج أثبتلكم كلكم الكلام ده.

لو سمحتو إبعدوا عن الحاجات الغلط، التريندات دي مصيبة، هما بيحاولوا طول الوقت إنهم يدسوا السم فى العسل، مع إن اللي بيحصل ده مفيهوش أي عسل خالص، بالعكس دي كلها أفكار مسمومة، وأمراض نفسية، وتوجيهات وتعليمات من جهات بتحاول دايمًا إنها تتآمر علينا، وعلى شبابنا، وعلى بلادنا عشان كده أنا حاولت أعمل العكس وبدل م أقدملكم السم فى العسل

قدمتلكم العسل فى السم،

لأنى مكنش قدامي حل تاني، عشان أعرف أوصل ليكم.

أرجوكم ..

بلاش تشجعوا الأفكار الخبيثة دي.

بلاش تساعدوا على انتشارها.

بلاش تصنعوا نجوم من ناس ميستحقوش إنهم يبقو بني آدمين أصلاً.

وأنا عن نفسي خلاص، من النهاردة مش هنزل غير بأعمال محترمة بجد، تليق بيا وبيكم، وعلى فكرة، أنا أصلاً مش مطرب، أنا ممثل، وإن شاء الله الفترة اللي جاية هشارك في مجموعة من الأعمال اللي هتشوفوني فيها بطريقة تانية خالص.

ومن النهاردة إن شاء الله، هبدأ حملة مقاطعة لأي حد بيقدم محتوى غير هادف.

ومحتاجلكم عشان الحملة دي تكبر وتوصل لمصر والعالم العربي كله.

تفاعل الجمهور مع كلمات (سيف) تفاعل غير مسبوق، وانتشر اللايف في جميع أنحاء الوطن العربي، وحصل على أرقام قياسية في المشاهدات والتفاعلات، وتصدرت صورة (سيف) جميع الصحف والمواقع تحت عناوين ومانشيتات مختلفة:

((الكولونيل سيف يعلن توبته))

((سيف الذي صفع المجتمع على وجهه))

((سيف الذي أضحكنا ثم أبكأنا))

فى مكتب وكيل النيابة جلس (جمال) صامتاً، لا يستطيع الرد، بعد أن وجهت إليه العديد من التهم، كان أهمها تلفيق ونشر أخبار كاذبة بالجرائد والمواقع الإلكترونية، وفى نهاية التحقيق، نظر له (وكيل النيابة)، وسأله:

- ما هو قولك فيما هو منسوب إليك؟

ظل (جمال) عاجزاً عن الرد، فأكمل (وكيل النيابة):

- أمرنا نحن بحبس المتهم جمال أحمد الصفتي ٤ أيام على ذمة التحقيق، ويراعى التجديد فى معاده. عندما خرج (جمال) من مكتب وكيل النيابة - مكلبشا فى يده - وجد (نرمين) التي نظرت له فى ذهول، ولم تصدق ما تراه، وقد ذرفت دمعة من عيناها وهي تقول:

- طلقني يا جمال.

- كده بردو يابنت عمي؟ عايزة تسيبيني فى الظروف اللي أنا فيها دي؟

- متسطعبتش يا جمال، أنا أصلاً مكونتتش مرتحالك، وكنت شاكة فى شغلك الزبالة مع عاصي، ياريتني م كنت سمعت كلامك من الأول، طلقني يا جمال.

- أطلقك عشان ترجعي لسيف، ده بعينك، مش هطلقك يا نرمين.

- هتطلقني يا جمال، هتطلقني ورجلك فوق رقبتك.

فى مكتب وكيل النيابة جلس (عاصى) صامتاً، لا يستطيع الرد، بعد أن وجهت إليه العديد من التهم أهمها: التهرب الضريبي، والتعدي على حقوق الملكية لعدد من كلمات وألحان الأغاني، ونشر الإباحية فى المجتمع، ثم أكمل (وكيل النيابة):

- ولسة كمان قضية ماهيتاب السيد عبد السلام الشهيرة ب ماهي، اللي بتتهمك فيها بانك صورتها فى أوضة نومها مع جوزها، ونشرت الفيديو.

- ده مش جوزها يا باشا، ومفيش حاجة تثبت إنه جوزها.

- لحد دلوقتي آه، لكن لو هي قدرت تثبت إنه كان جوزها فعلا، يبقى انت كده لبست قضية كمان يا عاصى، هاه؟ هل لديك أي أقول أخرى؟

- لا يا باشا.

- قررنا نحن حبس المتهم عاصى أشرف عبد السميع ٤ أيام على نمة التحقيق، ويراعى التجديد فى معاده.

خرج (عاصى) من مكتب وكيل النيابة - وهو مكلبشا فى يده - فوجد (سيف) الذي كان واقفا ينتظره، فقال له (عاصى) وهو يستنجد به:

- شوفت اللي حصلي يا سيف؟

- قلبي عندك يا أخويا.

قالها (سيف) بسخرية، ثم ابتسم وضافت عيناه بدهاء وخبث شديدين وهو يكمل:

- بس إيه رأيك؟

تعجب (عاصى) وتساءل:

- رأيي فى إيه؟

- رأيك فى طقم التهم اللي كان مستتيك جوة، حطيطهولك صح أنا، لأ وإيه، على مقاسك بالضبط.

انتفض (عاصي) عند سماعه تلك الكلمات، وقد إحمر وجهه، وهو ينظر ل(سيف) الذي أكمل:

- آه صحيح، في واحد حبيبك نفسه يشوفك وانت متكلبش كده.

ثم أشار (سيف) بيده، فظهر (عاطف) الذي ضحك بسخرية وشماتة، وهو ينظر ل(عاصي) ويقول:

- منور يا عاصي باشا، عليا النعمة الكلبش هياكل من إيدك حتة، هههههه.

فى قسم الشرطة وقف العسكري على باب الحجز وأشار ل(علاء وأيمن) وهو يقول:

- تعالو الباشا عايزكم.

دخل (علاء وأيمن) مكتب الضابط، فوجدا (الضابط) جالساً على مكتبه، وأمامه يجلس (سيف) الذي

أشعل سيجارته، وهو يشرب القهوة، فنظر (أيمن) له، وقال:

- سيف؟

لم يرد عليه (سيف)، لكنه إلتفت نحو الضابط، وقام واقفاً، وهو يسلم عليه، ويقول بإبتسامة:

- أحنا متشكرين جدا يافندم.

ثم إلتفت ل (علاء وأيمن) وهو يقول:

- يلا بينا

تعجب (أيمن) وسأل:

- يلا بينا على فين؟

- يلا بينا نمشي.

- نمشي إزاي؟ أنا مش فاهم حاجة.

- يلا بس وهفهمكم بعدين.

خرجوا من القسم وركبوا السيارة مع (سيف)، وكان (علاء وأيمن) فى حالة من الذهول والدهشة، وكان

كلا منهما يسأل (سيف) ماذا حدث؟ وكيف إستطاع أن يخرجهما من القسم؟ لكن (سيف) لم يرد على

أحدا منهما، ظل يقود السيارة فى صمت.

فى منزل (علاء)، وقف كلا من (علاء وأيمن) ينظران ل(سيف) الذى ظل ينظر لهما دون أن يتحدث بكلمة، فسأله (أيمن):

- مش هتقولنا بقى يا سيف إيه اللى حصل؟ وإزاي قدرت تخرجنا من القسم؟
حكى لهما (سيف) ما حدث.

عندما كان جالساً فى سيارته أمام منزل (علاء)، ثم إتصل بالطباطب الذى جاء وقام بالقبض عليهما، وأنه فى أثناء ذلك كان واقفاً على باب العمارة وقام بتصويرهما، ثم أرسل الفيديو إلى (عاصي) الذى لم يتردد لحظة واحدة فى نشره على صفحته.

فدهش (أيمن)، واتسعت عيناه، ولم يصدق ما سمعه، ثم قال:

- يعنى انت اللى بلغت عننا يا سيف؟
- آه، أنا اللى بلغت عنكوا، بس متنساش أن أنا بردو اللى خرجتكو.
- إزاي يعنى؟

- أولاً الضابط ده صديق قديم ليا، ثانياً مكنش فى إذن نيابة أصلاً، ثالثاً والأهم مفيش حالة تلبس لأن تقرير المعمل الجنائي أثبت ان الحشيش اللى كان معاكو ده مكنش حشيش أصلاً، لأن أنا يومئذ كنت مضطرب مع الواد الديلر بتاعكو يديكو حتة حنة بداله، وطبعاً عشان انت وعلاء أهبل من بعض، محدش فيكو قدر يعرف الفرق.

ساد المكان حالة من الصمت، ونظر (علاء وأيمن) إلى بعضيهما فى دهشة، ثم نظر(أيمن) ل(سيف) وسأله وما زال الدهول يكسو ملامح وجهه:

- وانت ليه تعمل فينا كده يا سيف؟
هنا إنفجر (سيف) وتحول هدوءه إلى عاصفة من الغضب، وهو يقول:

- عشان كان لازم تفوقو من القرف اللي كنتو فيه، محدش فيكو سمع كلامي، وعاصي عرف يضحك عليكو ويسحبكو واحد ورا التاني، عاصي، هاه، عاصي اللي فضح ماهي، عاصي اللي مترددش لحظة أنه يرفع فيديو القبض عليكو، أنا لما بعته الفيديو كنت عارف أنه هيرفعه وهيفضحكو قدام الدنيا كلها، لأنه ميفرقش معاه غير الترند، الترند وبس، كان لازم تفوقو وتعرفو أن عاصي واللي زيه دول ناس زبالة، وإني مكونتش عايز أمشي في الطريق ده، عشان بس أنا اللي مش عايز أمشي فيه، مش عشان مش عارف أمشي فيه، وأديني أهو لما مشيت في طريقكو حطيت ع الكل.

ظهرت ملامح الحسرة والندم على وجهي (أيمن وعلاء)، ثم قال (أيمن):

- كان عندك حق يا سيف، ياريتنا كنا سمعنا كلامك من الأول، إحنا كده خلاص إتحرقنا بعد م عاصي فضحنا ورفع الفيديو، ومحدش هيعبرنا بعد كده.

ذرف (علاء) دمعة من عينه وهو يقول:

- طب وماهيتاب، هنسبها كده؟

أخرج (سيف) ورقة من جيبه، وأعطاهل (علاء) الذي فتحها، فوجدها ورقة الزواج العرفي التي تثبت براءة ماهيتاب، فنظر نحوه بدهشة كبيرة، وقال:

- انت جبت الورقة دي إزاي يا سيف؟

- ملكش دعوة، بكرة الصبح تاخذ المحامي وتطلع ع النيابة، وترفق الورقة دي في ملف القضية.

ثم خرج (سيف) من باب الشقة وتركهما في حيرتهما.

(٥٨)

فى مكتب وكيل النيابة جلست (ماهيتاب) - وقد ظهرت عليها آثار الحبس لعدة أسابيع- أمام (وكيل النيابة) الذى كان ممسكا بورقة الزواج العرفى بيده، وتفحصها جيدا، ثم قال:
- قررنا إخلاء سبيل ماهيتاب السيد عبد السلام من سراي النيابة، ما لم تكن مطلوبة على ذمة قضايا أخرى.

(٥٩)

- طلقني يا جمال، بقولك طلقني

قالتها (نرمين) وهي واقفة في قاعة المحكمة أمام قفص الإتهام الذي وقف بداخله كلا من (جمال وعاصي).

كان ذلك بعد أن قال القاضي:

- حكمت المحكمة حضوريا على المتهم الأول جمال أحمد الصفتي بالسجن ٣ سنوات مع الشغل والنفاذ، والمتهم الثاني عاصي أشرف عبد السميع بالسجن ٧ سنوات مع الشغل والنفاذ، رفعت الجلسة.

(٦٠)

بعد عدة أشهر كانت (نرمين) جالسة وقد بدا عليها الإرهاق الشديد في مكتب (المحامي) الذي كان ممسكا بورقة بيده، ثم أعطاها لها، وهو يقول:
- إتفضلني يامدام نرمين، خلاص المحكمة حكمت لحضرتك بالطلاق للضرر من الأستاذ جمال، وأدي قسيمة الطلاق آهيه.

خرجت (نرمين) من مكتب المحامي، ومشيت على قدميها حتى وصلت للنيل - في نفس المكان الذي كان دائماً يجمعها ب(سيف) - ووقفت أمام لافتة إعلانية كبيرة وضع عليها صورة ل(سيف)، وكانت الصورة لإعلان فيلم جديد من بطولته.

كان ذلك في نفس الوقت الذي كانت (ماهيتاب) فيه جالسة في منزل بسيط جدا وهي تشم الكوكايين وقد بدا عليها الفقر الشديد، وتدهور الحال.

وكان ذلك أيضا في نفس الوقت الذي كان يجلس فيه كلا من (علاء وأيمن) بغرفة في إحدى اللوكاندات الفقيرة بمنطقة وسط البلد، وهما يدخان الحشيش، وقد بدا تدهور حالتها الصحية بشكل ملحوظ، وتدهور الحال بشكل عام.

بعد عدة أسابيع، على النيل - في نفس المكان الذي إعتاد (سيف) أن يذهب إليه دائماً - وقف كلا من (سيف و رانيا ونرمين وأيمن وعلاء وماهيتاب)، وكانوا ينظرون جميعاً في صمت نحو (سيف) الذي أشار ل (رانيا) بأن تخرج من الحقيبة مجموعة من الأوراق، ثم وزعها عليهم وهو يقول:

- دي عقود الاحتكار اللي كنتو ماضين عليها مع عاصي، كده كل واحد معاه العقد بتاعو، يعني انتو كده بقيتو أحرار.

نظر كل واحد منهم لورقة العقد التي في يده، وقد إرتسمت ملامح الحسرة على وجه (ماهيتاب) التي ذرفت دمعة من عيناها، وهي تقول:

- بعد إيه، أنا خلاص محدش راضي يعبرني.

وأكمل علاء:

- فعلا، إحنا خلاص محدش راضي يشغلنا معاه.

نظر (أيمن) بإستغراب وحيرة شديدين نحو (سيف)، ثم ضاقت عيناه وهو يسأل:

- سيف؟ هو انت جبت العقود دي إزاي؟ وكمان قبل كده لما أديتني ورقة الجواز العرفي بتاعت ماهيتاب، بردو جبتها إزاي؟

ثم نظرت (نرمين) ل(سيف وأيمن) وهي تقول:

- إيه ده؟ أنا مش فاهمة حاجة.

أدار (سيف) وجهه، وأعطاهم ظهره، ونظر نحو النيل، وأخذ نفسا عميقا، ثم بدأ يحكي لهم عن الحوار الذي دار بينه وبين (عاطف) عندما ذهب لزيارته مع (شوقية) في السجن.

- مين ؟ أستاذ سيف؟

- إزيك يا عاطف.

- الحمد لله، إزيك يا أستاذ سيف، والله فيك الخير، شفت ابن الكلب اللي أسمه عاصي عمل فيا إيه؟

- م هو ده الموضوع اللي أنا جايلك علشانه.
- عليا الحرام من ديني لأقتله، أخرج بس من هنا، وديني م أنا سايب حقي.
- لا لا لا، أنا عايزك تهدي كده، وتصلي ع النبي، أخذان الحق صنعة يا عاطف.
- عليه الصلاة والسلام، اهدى، اهدى إزاي يا أستاذ سيف؟
- بص يا عاطف، أنا هخرجك من هنا.
- مش فاهم يا باشا لامواخدة، هتخرجني إزاي، هتهربني يعني؟
- أنا هدفعلك الشرط الجزائي، وهخرجك من هنا، وهجبيلك حقك لحد عندك، بس عايزك تنفذ كل اللي هقولك عليه، فاهم، هتنفذ كل اللي هقولك عليه يا عاطف.
- ***
- (سيف و عاطف) يجلسان في سيارة أمام شركة (عاصي)
- فهتمت يا عاطف هتعمل إيه، أول م هفصل الكهربا، هتدخل انت على علبة الكاميرات، تفصلها، وبعدها أنا هرجع الكهربا تاني، تقوم انت تدخل وتنفذ، تمام؟
- تمام ياكبير.
- عاطف؟ خليك معايا ع التليفون لحظة بلحظة، ومتشغلش دماغك ومتجودش من عندك، وإعمل اللي قولتلك عليه وبس، فاهم؟ متشغلش دماغك.
- متقلقش يا باشا، مش هشغل دماغي، هنفذ كل اللي قولتلي عليه بالحرف الواحد.
- ثم نزلوا من السيارة، وتوجه (سيف) نحو علبة الكهربا العمومية، وفصلها، ثم صعد (عاطف) سريعاً، وفتح باب الشركة، وقام بفصل علبة الكاميرات، ثم أعاد (سيف) الكهربا مرةً أخرى، فدخل (عاطف) إلى مكتب (عاصي) وفتح جهاز الكمبيوتر الخاص به، وقال ل (سيف) في التليفون:
- كده الجهاز إتفتح يا باشا.
- حلو أوي، هتركب الفلاشة، وتنسخ كل اللي على الجهاز زي م علمتك بالظبط.
- حصل يا باشا.

- تمام، سيب الفلاشة تحمل، وروح إفتح الخزنة بالأرقام اللي قولتلك عليها، صور كل الأوراق اللي موجودة، تجيبلي الأصل، وتحط الصور مكانه، ولو لقيت أي فلوس في الخزنة متمدش إيدك عليها يا عاطف، فاهم؟

- أوامرك ياكبير.

((كان سيف قد لمح عاصي من قبل وهو يدخل الأرقام السرية للخنزة))

بعد حوالي نصف ساعة كان (عاطف) قد أنهى مهمته، وبينما كان (سيف) يجلس في السيارة يدخن بشرآهة وقد بدا عليه التوتر، أخبره (عاطف) على الهاتف:

- أنا كده خلصت يا سيف باشا.

- إتأكد أن كل حاجة رجعت زي م كانت.

- عيب عليك يا باشا، متقلقش، كله تمام التمام.

- الله ينور عليك، أنا هقطع الكهرباء تاني، وانت هتوصل علبة الكاميرات تاني زي م كانت، وتنزلي على طول.

- إعتبره حصل يا باشا.

(سيف) يجلس في مكتب أحد المحامين ويعطيه الفلاشة وهو يقول:

- الفلاشة دي عليها كل الفيديوهات والصفقات والمستندات والحسابات اللي تودي عاصي في ستين دأهية، بكرة ان شاء الله يامتر تطلع على مكتب النائب العام، وتشوف شغلك.

بعد أن انتهى (سيف) من رواية ما حدث، أدار وجهه لهم مرة أخرى، وأخذ ينظر لهم في صمت، وتأمل ملامح وجوههم وهم يحاولون أن يربطوا بين الأحداث، وبعدها قال (أيمن):

- معقول؟ انت يا سيف اللي عملت كل ده؟

بكت (ماهيتاب) بشدة، وهي تقول:

- يعني انت يا سيف كنت عارف حوار الفيديو اللي جاسر مسجلهولي ده من الأول؟ طب ومحذرتيش ليه قبل م يرفعه وأنفضح الفضيحة دي كلها؟

نظر (سيف) لها وهو يرد:

- وأنا كنت أعرف منين أنه هيرفع الفيديو؟ وبعدين م أنا ياما حذرتك يا ماهيتاب، بس انتي عملتي اللي في دماغك، وانتى اللي عملتي في نفسك كده.

ثم إلتفت للجميع وهو يكمل:

- أنا ياما حذرتكم كلكم، محدش سمع كلامي، كل واحد فيكو هو اللي عمل في نفسه كده.

قالت (نرمين) وقد ذرفت دمعة من عينها:

- يعني انت مجمعا النهاردة كلنا عشان تشمت فينا يا سيف؟

- أنا؟ أنا اشمتم فيكو يا نرمين؟!!!!

فقال (علاء):

- أومال انت مجمعا ليه يا سيف؟ عموما خلاص كل حاجة ضاعت.

وضع (سيف) يده على كتف (علاء) وهو يقول:

- مفيش حاجة ضاعت ولا حاجة، كل حاجة هترجع، وأحسن بكتيير من الأول كمان، بس المرة دي بطريقتي، طريقتي اللي مكنتش عجاكم في الأول.

ثم إلتفت نحو (رانيا)، وأخذ منها مجموعة من الأوراق، وقام بتوزريها عليهم، وهو يقول:

- إتفضلوا، دي عقود محترمة، وبتحفظ حقوقكم بجد، مع شركة محترمة بتقدر الفن والفنانين.

إقترب من (علاء) وهو يقول:

- عقد ٣ ألبومات يا نجم، أغاني بجد مش الكلام الفارغ اللي كنت بتغنيه، ربنا يوفقك

ثم إقترب من (أيمن) وقال:

- عقد كتابة كلمات ال ٣ البومات بتوع علاء يا عم أيمن، ومش بس كده، انت كمان هتنضم لورشنة

الكتابة اللي هتكتبنا سيناريو الفيلم الجديد إن شاء الله.

ثم إقترب من (نرمين وماهيتاب) وهو يقول:

- عقود ٣ أفلام.

ثم حاول أن يمازح (ماهيتاب) ليخرجها من حالة الحزن:

- بس دي عقود تمثيل يا ماهيتاب، هاه، تمثيل مش رقص، واخدة بالك يااااا ست ماهي.

إبتسمت (ماهيتاب)، وفرحوا جميعاً فرحة كبيرة، وإنقلبت دموعهم إلى سعادة، ثم إلتفوا حول (سيف)

يشكروه، بينما هو كان ينظر نحو (رانيا)، ثم قال:

- لو عايزين تشكرو حد بجد، يبقى لازم تشكرو رانيا.

بعد عدة أسابيع كان (عاطف ورضا) يحملان المشروبات ويوزعونها على الحاضرين في الحفل الكبير الذي أقامه (سيف) في فيلته الجديدة، وبينما كان الجميع مشغولون بالحفل، لمح (سيف) (شوقية) وهي تدخل من باب الفيلا، فذهب لها، وإبتسم، وهو يقول:

- كنت عارف إنك هتيجي.

- هو أنا بردو أقدر أتأخر عليك يا أستاذ سيف.

- لا، أستاذ إيه بقى، إحنا خلاص بقينا أصدقاء دلوقتي، مفيش أستاذ دي تاني.

- ماشي يا سيف.

- أنا متشكر جدا يا شوقية، وبجد من غيرك مكونتش هعرف أعمل كل دة.

لمحتهم (رانيا) فشعرت بغيرة داخلية، وهي تنتظر لهما، فإقتربت منهما، وهي تقول:

- أهلا يا شوشو، منورة الحفلة.

ثم مسكت (سيف) من يده، وأخذته جانبا، وهي تقول:

- هتقضي الليلة كلها مع شوشو ولا إيه؟ لازم تقف تستقبل باقي ضيوفك.

- إيه ده، هو انتي بتغيري ولا إيه؟

إرتبكت (رانيا)، وبدا ذلك على نبرة صوتها، وهي تقول:

- أغير؟ أغير ليه يعني؟

إقترب (سيف) من (رانيا)، ونظر في عينها، ثم قال مبتسما:

- تغيري ليه؟!!!، إيه السؤال ده؟ تغيري عشان بتحبيني مثلا؟

أدارت (رانيا) عينها، ولم تستطع النظر في عين (سيف)، وهي تقول:

- إيه اللي بتقوله ده؟ الموضوع ده أنا خلاص قفلته من زمان.

- ياسلام، أو مال كل اللي انتي عملتيه علشانى ده، عملتيه ليه؟

قالها وهو يمسح دمعته على خدها بيده، ثم أكمل:

- تصدقي يا نرمين، أنا أول مرة أخذ بالي إنك حلوة أوي كده وانتى بتعيطي.

إبتسمت (نرمين) وهي تقول:

- بس يا أيمن.

- بتكلم بجد، شكلك حلو أوي وانتى بتعيطي، بقولك إيه، تتجوزيني؟

- إيه؟

- بقولك تتجوزيني، بس بشرط، عايزك تفضلي تعيطي كده على طول، لإنك بجد شكلك زي القمر

وانتى بتعيطي.

نظرت له دون ان تنطق بكلمة، فقبلها من يدها.

كان ذلك في نفس الوقت الذي إقترب فيه (علاء) من (ماهيتاب)، ثم قال:

- وحشيتيني يا ماهيتاب.

إلتفت نحوه في خجل، وهي تقول:

- معقول يا علاء، بعد كل دة.

- أيوة معقول، أنا لسة بحبك يا ماهيتاب.

ثم وقف (سيف) في وسط الحفل ومسك مكبر الصوت، ثم قال:

- ودلوقتي يا جماعة هنسمع أحدث أغنية لعلاء.

فصفق الحاضرون، ثم أكمل (سيف) مازحا:

- بس من غير رقص يا ماهي، من غير رقص، هههههههههه.

أحمد فتحي غزالي

.كاتب وروائي مصري

.مدرس تاريخ

.محاضر مناهج وطرق تدريس

مقدم برنامج (المؤرخ) على الفيسبوك واليوتيوب

:حاصل على

.ليسانس آداب - قسم تاريخ - جامعة القاهرة

.بكالوريوس تربية - كلية الدراسات العليا للتربية - جامعة القاهرة

.تمهيدي ماجستير - كلية الدراسات العليا للتربية - جامعة القاهرة

.ماجستير مناهج وطرق تدريس - كلية ستانفورد - المملكة المتحدة البريطانية

.دكتوراه مناهج وطرق تدريس - كلية ستانفورد - المملكة المتحدة البريطانية

كتب أخرى للمؤلف

:

- العسل في السم. (رواية)

- العرش والدماء. (مجموعة قصصية تاريخية)

:للتواصل

whatsApp: ٠١٠٠٢٢٦٨٢٥٤

Facebook messenger: Ahmed Ghazaly

غazaly

تمت بحمد الله،،،

**كم لديك من السطور الجميلة التي أخذت
منك الكثير من الجهود والاعتناء
لكي تكون أفضل ما يمكن لتعبر بها عن شعور
داخلي لم تستطع أن تشاركه مع أحد غيرك.**

**مهما كانت سطورك
قصص... روايات... أشعار... مقالات
باللغة العربية أو الإنجليزية أو الفرنسية**

تواصل معنا

لتشارك سطورك مع العالم

٠١١٢٢٣٨٠٤٤٣